

四庫全書

史部

欽定四庫全書

史部  
史記卷七

詳校官侍讀學士臣陸伯焜

洗馬臣王坦修覆勘

覆校官中書臣陳林

校對官中書臣孫希旦

謄錄貢生臣陳廷鏞

欽定四庫全書

史記卷七

漢太史

令司馬遷撰

宋中郎外兵曹參軍裴駙集解

唐國子博士弘文館學士司馬貞索隱

唐諸王侍讀率府長史張守節正義

項羽本紀第七

陳隱項羽崛起爭雄一朝假號西楚竟未踐天子之位而身首別離斯亦不可稱本紀宜降為

世家

項籍者下相人也

集解駟案地理志臨淮有下相縣索隱縣名屬臨淮案應劭云相水名出

沛國沛國有相縣其水下流又因置縣故名下相也正義括地志云相故城在泗州宿預縣西北七十里秦縣

項胡講反

字羽

索隱按序傳籍字子羽也

初起時年二十四其季父

項梁

索隱崔浩云伯仲叔季兄弟之次故叔云叔父季云季父

梁父即楚將項燕

正義

燕高賢反

為秦將王翦所戮者也

集解駟案始皇本紀云項燕自殺索隱此云為王翦

所殺與楚漢春秋同而始皇本紀云項燕自殺不同者蓋燕為王翦所圍逼而自殺故不同也

項氏世

世為楚將封於項

索隱地理志項城縣屬汝南正義括地志云今陳州項城縣城即古項子

國故姓項氏項籍少時學書不成去學劍又不成項梁怒之籍曰書足以記名姓而已劍一人敵不足學學萬人敵於是項梁乃教籍兵法籍大喜略知其意又不肯

竟學項梁嘗有櫟陽逮捕

索隱按逮捕及為櫟陽縣所逮捕錄也故漢

史制獄有逮捕正義櫟音樂逮音代

乃請斬

集解蘇林曰斬音機縣屬沛國

獄掾曹咎書

抵櫟陽獄掾司馬欣以故事得已

集解應劭曰項梁曾坐事傳繫櫟陽獄徒

斬獄掾曹咎取書與司馬欣抵歸已止也韋昭曰抵至也謂梁嘗被櫟陽縣逮捕梁乃請斬獄掾曹咎書至櫟陽獄掾司馬欣事故得止息也索隱服虔云抵歸也劉伯莊云抵相憑託也

項梁殺人與籍

避仇於吳中吳中賢士大夫皆出項梁下每吳中有大

繇役及喪項梁嘗為主辦陰以兵法部勒賓客及子弟

以是知其能秦始皇帝游會稽渡浙江

索隱韋昭云浙江在今錢塘浙

音折音灼音逝非也蓋其流曲折莊子所謂制河即其水也制折聲相近

梁與籍俱觀籍曰

彼可取而代也梁掩其口曰毋妄言族矣梁以此奇籍

籍長八尺餘力能扛鼎

集解韋昭曰扛舉也索隱說文云扛橫闕對舉也音江

才

氣過人雖吳中子弟皆已憚籍矣秦二世元年七月陳

涉等起大澤中

索隱徐氏云在沛郡斬縣

其九月會稽守

集解徐廣曰爾時未

言太守正義守音狩漢書云景帝中二年七月更郡守為太守

通謂梁曰

集解駟案楚漢春秋曰會

稽假守殷通正義言假者無攝之也

江西皆反此亦天亡秦之時也吾聞

先即制人後則為人所制

索隱謂先舉兵能制得人後則為人所制故荀子曰制人

之與為人制也相去遠矣

吾欲發兵使公及桓楚

正義張晏云項羽殺宋義時桓楚為

羽使懷王

將是時桓楚亡在澤中梁曰桓楚亡人莫知其處

獨籍知之耳梁乃出誠籍持劍居外待梁復入與守坐

曰請召籍使受命召桓楚守曰諾梁召籍入須臾梁胸

籍曰可行矣於是籍遂拔劍斬守頭項梁持守頭佩其

印綬門下大驚擾亂籍所擊殺數十百人

索隱此不定數也自百已

下或至八十九十故云數十百

一府中皆懼伏

索隱說文云擊失氣也懼音之涉反

莫敢

起梁乃召故所知豪吏諭以所為起大事遂舉吳中兵

使人收下縣得精兵八千人梁部署吳中豪傑為校尉

候司馬有一人不得用自言於梁梁曰前時某喪使公

主某事不能辦以此不任用公衆乃皆伏於是梁為會

稽守籍為裨將徇下縣

集解李奇曰徇略也如淳曰徇音撫徇之徇徇其人民

廣

陵人召平於是為陳王徇廣陵

正義揚州

未能下

正義下胡嫁反以兵



威服之  
曰下

聞陳王敗走秦兵又且至乃渡江矯陳王命

正義

矯紀兆反召平徙廣陵渡京

口江至吳詐陳王命拜梁拜梁為楚王上柱國

集解徐廣

曰二世之二年正月也駟案應劭曰上柱國上卿官若今相國也

曰江東已定急引兵

西擊秦項梁乃以八千人渡江而西聞陳嬰已下東陽

集解晉灼曰東陽縣本屬臨淮郡漢明帝分屬下邳後復分屬廣陵索隱下音如字按以兵威服之曰下胡嫁

反彼自歸服曰下如字讀他皆倣此東陽縣名屬廣陵正義括地志云東陽故城在楚州盱眙縣東七十里秦

東陽縣城也在淮水南

使使欲與連和俱西陳嬰者故東陽令史

集解駟案晉灼曰漢儀注曰令史曰令史丞史曰丞史正義楚漢春秋云東陽獄史陳嬰

居縣中素

信謹稱為長者東陽少年殺其令相聚數千人欲置長  
無適用乃請陳嬰嬰謝不能遂彊立嬰為長縣中徙者

得二萬人少年欲立嬰便為王異軍蒼頭特起

集解應劭曰蒼

頭特起言與衆異也蒼頭謂士卒卑巾若赤舂青領以  
相別也如淳曰魏軍兵卒之號戰國策魏有蒼頭二十  
萬索隱晉灼曰殊異其軍為蒼頭謂著青帽如淳云特  
起猶言新起也按為蒼頭軍特起欲立陳嬰為王嬰母  
不許嬰稱王言天下

方亂未知瞻烏所止 陳嬰母謂嬰曰自我為汝家婦未

嘗聞汝先古之有貴者今暴得大名不祥不如有所屬

事成猶得封侯事敗易以亡非世所指名也

集解張晏曰陳嬰母

潘旌人墓在潘旌索隱潘旌是邑聚之名後為縣屬臨淮

嬰乃不敢為王謂其軍吏

曰項氏世世將家有名於楚今欲舉大事將非其人不

可我倚名族亡秦必矣於是衆從其言以兵屬項梁項

梁渡淮黥布蒲將軍亦以兵屬焉

集解服虔曰英布起於蒲地因以為號如

淳曰言當陽君蒲將軍皆屬項羽此自更有蒲將軍索隱按布姓英答繇之後後以罪被黥故改姓黥以應相者之言韋昭云蒲姓也是英布與蒲將軍二人共以兵屬項梁也故服虔以為英布起蒲非也按黥布初起於

江湖凡六七萬人軍下邳

正義被悲反下邳泗水縣也應劭云邳在薛徙此故曰下

邳按有上邳故曰下邳

當是時秦嘉已立景駒為楚王

集解駟案陳涉世家

曰秦嘉廣陵人文穎曰

軍彭城東

正義括地志云徐州彭城縣古彭祖國也

秦嘉軍于此城之東

欲距項梁項梁謂軍吏曰陳王先首事戰不

利未聞所在今秦嘉倍陳王而立景駒逆無道乃進兵

擊秦嘉秦嘉軍敗走追之至胡陵

集解鄧展曰今胡陵屬山陽漢章帝改曰

陸嘉還戰一日嘉死軍降景駒走死梁地項梁已并秦

嘉軍軍胡陵將引軍而西章邯軍至粟

集解徐廣曰縣名在沛

項

梁使別將朱雞石餘樊君與戰餘樊君死朱雞石軍敗

亡走胡陵項梁乃引兵入薛

正義括地志云故薛城古薛侯國也在徐州滕國縣

界黃帝之所封也左傳定公元年薛宰云薛之祖  
其仲居薛為夏車正後為孟嘗君田文封邑也 誅雞

石項梁前使項羽別攻襄城正義許州襄城縣襄城堅守不下

已拔皆阮之還報項梁項梁聞陳王定死召諸別將會

薛計事此時沛公亦起沛往焉居鄴人范增音索隱晉灼音勦絕之

勦地理志居鄴縣在廬江郡音巢是故巢國夏桀所奔荀悅漢紀云范增阜陵人年七十素居

家好奇計往說項梁曰陳勝敗固當正義顧著作云固宜當應敗也當音

如夫秦滅六國楚最無罪自懷王入秦不反楚人憐之

至今故楚南公曰集解徐廣曰楚人也善言陰陽駟按文穎曰南方老人也正義虞喜志林

云南公者道士識廢興之數知亡秦者必於楚漢書藝文志云南公十三篇六國時人在陰陽家流楚雖

三戶亡秦必楚也

集解瓚曰楚人怨秦雖三戶猶足以亡秦也索隱臣瓚與蘇林解同韋昭

以為三戶楚三大姓昭屈景也二說皆非按左氏以界楚師於三戶杜預註云今丹水縣北三戶亭則是地名不疑正義按服虔云三戶漳水津也孟康云津峽名也在鄴西三十里括地志云濁漳水又東經葛公亭北經三戶峽為三戶津在相州滏陽縣界然則南公辨陰陽識廢興之數知秦亡必於三戶故出此言後項羽果渡三戶津破章邯軍降章邯秦遂亡是南公之善識今陳勝首事不立楚後而自

立其勢不長今君起江東楚蠱起之將

集解如淳曰蠱起猶言蠱午也

衆蠱飛起交橫若干言其多也索隱凡物交橫為午言蠱之起交橫屯聚也故劉向傳註云蜂午雜沓也鄭玄

云一縱一橫為干

皆爭附君者以君世世楚將為能復立楚之

後也

正義為于偽反

於是項梁然其言乃求楚懷王孫心民間

為人牧羊立以為楚懷王

集解徐廣曰此時二世之二年六月

從民所望

也

集解應劭曰以祖諡為號者順民望

陳嬰為楚上柱國封五縣與懷王

都盱台

集解鄭玄曰音煦怡正義盱况于反盍以之反盱眙今楚州臨淮水懷王都之

項梁自

號為武信君居數月引兵攻亢父

正義亢音剛又苦浪反父音甫括地志云

亢父故城在兗州任城縣南五十一里

與齊田榮司馬龍且

正義子余反

軍救

東阿

正義括地志云東阿故城在濟州東阿縣西南二十五里漢東阿縣城秦時齊之阿也

大破

秦軍於東阿田榮即引兵歸逐其王假假亡走楚假相

田角亡走趙角弟田間故齊將居趙不敢歸田榮立田

儋子市為齊王項梁已破東阿下軍遂追秦軍數使使

趣齊兵欲與俱西

正義下使色  
吏反趣音促

田榮曰楚殺田假趙殺

田角田間乃發兵項梁曰田假為與國之王

集解如淳  
曰相與交

善為與國黨與也索隱高誘注  
戰國策云與國同福之國也

窮來從我不忍殺之趙

亦不殺田角田間以市於齊

集解張晏曰若市買相貿易以利也梁救榮難猶不

用命梁念殺假等榮未必多出兵不如依春秋寄公待  
以禮也又可以貿易他利以除已害遂背德可輔假以



伐齊故曰市貿易也晉灼曰假故齊王建之弟欲令楚殺之以為已利而楚保全不殺以買其計故曰市也索隱韋昭云市利於齊也劉氏亦云市猶要也留田假而不殺欲以要脅田榮也齊遂不肯發兵

助楚項梁使沛公及項羽別攻城陽

正義括地志云濮州雷澤縣本漢城

陽在州東九十一里地理志云城陽屬濟陰郡古邲伯國姬姓之國史記周武王封季弟載于邲其後遷于城之陽故曰城陽屠之西破秦軍濮陽東

正義括地志云濮陽縣在濮州西八十六里濮

縣也古吳之國別攻城陽屠之西破秦軍濮陽縣也東即此縣東

秦兵收入濮陽沛公

項羽乃攻定陶

正義定陶曹州城也從濮陽南攻定陶

定陶未下去西畧

地至雒丘

正義雍丘今汴州縣也地理志云古杞國武王封禹後於杞號東樓公二十一世簡公為

楚所滅即此城也

大破秦軍斬李由

集解應劭曰由李斯子也

還攻外黃

正義

括地志云故周城即外黃之地在雍丘縣東張晏曰魏郡有內黃縣故加外也臣瓚曰縣有黃溝故名外

黃未下項梁起東阿西北至定陶再破秦軍項羽等又

斬李由益輕秦有驕色宋義乃諫項梁曰戰勝而將驕

卒惰者敗今卒少惰矣秦兵日益臣為君畏之項梁弗

聽乃使宋義使於齊道遇齊使者高陵君顯

集解張晏曰顯名也

高陵縣名索隱晉灼云高陵屬琅邪曰公將見武信君乎曰然曰臣論武

信君軍必敗公徐行即免死疾行則及禍秦果悉起兵

益章邯擊楚軍大破之定陶項梁死沛公項羽去外黃

攻陳留陳留堅守不能下沛公項羽相與謀曰今項梁

軍破士卒恐乃與呂臣軍俱引兵而東呂臣軍彭城東

項羽軍彭城西沛公軍碭

集解應劭曰碭屬梁國蘇林曰碭音唐正義括地志云宋

州碭山縣本漢碭縣也在宋州東百五十里

章邯已破項梁軍則以為楚地

兵不足憂乃渡河擊趙大破之當此時趙歇為王陳餘

為將張耳為相皆走入鉅鹿城章邯令王離涉閒圍鉅

鹿

集解張晏曰涉姓閒名秦將也

章邯軍其南築甬道而輸之粟

集解應劭

曰恐敵抄輜重故築牆垣如街巷也

陳餘為將將卒數萬人而軍鉅鹿之

北此所謂河北之軍也楚兵已破於定陶懷王恐從盱

台之彭城并項羽呂臣軍自將之以呂臣為司徒以其

父呂青為令尹

集解應劭曰天子曰師尹諸侯曰令尹時去六國尚近故置令尹瓚曰諸侯之

卿唯楚稱令尹時立楚之後故置官司皆如楚舊

以沛公為碭郡長

集解蘇林曰長如郡

也封為武安侯將碭郡兵初宋義所遇齊使者高陵君

顯在楚軍見楚王曰宋義論武信君之軍必敗居數日

軍果敗兵未戰而先見敗徵此可謂知兵矣王召宋義

與計事而大悅之因置以為上將軍項羽為魯公為次

將范增為末將救趙諸別將皆屬宋義號為卿

集解徐廣曰一

作慶子冠軍

集解文穎曰卿子時人相褒尊之辭猶言公子也上將故言冠軍張晏曰若霍去病功冠

三軍因封為冠軍侯至今為縣名

行至安陽

索隱傳寬傳云徙攻安陽扛里則安陽與扛里俱在

河南顏師古以為今相州安陽縣按此兵猶未渡河不應即至相州安陽今檢後魏書地形志云已氏有安陽

城改已氏為楚邱今宋州楚邱西北四十里有安陽故城是也正義括地志云安陽縣相州所理縣七國時魏

寧新中邑秦昭王拔魏寧新中更名安陽張耳傳云章邯軍鉅鹿南築角道屬河餉王離項羽數絕邯角道王

離軍乏食項羽悉引兵渡河遂破章邯圍鉅鹿下又云渡河湛船持三日糧按徙滑州白馬津齋三日糧不至

邢州明此渡河相州漳河也宋義遣其子襄相齊送之  
至無鹽即今鄆州之東宿城是也若依顏監說在相州  
安陽宋義送子不可棄軍渡河南向齊西南入魯界飲  
酒高會非入齊之路義雖知送子曲由宋州安陽理順  
然向鉅鹿甚速不能數絕章邯甬道及持三日糧至也  
均之二理安陽送子至無鹽為長濟河絕甬道持三日  
糧寧有遲留史家  
多不委曲說之也  
留四十六日不進項羽曰吾聞秦軍

圍趙王鉅鹿疾引兵渡河楚擊其外趙應其內破秦軍

必矣宋義曰不然夫搏牛之蝱不可以破蟣蝨

集解如淳曰用

力多而不可以破蟣蝨猶言欲以大力伐秦而不可以  
救趙也索隱張晏云搏音博韋昭云蝱大在外蝨小在  
內故顏師古言以手擊牛之背可以殺其上蝨而不能  
破其內蝨喻方欲滅秦不可與章邯即戰也鄒氏博音

附今按言螽之搏牛本不擬破其上之螽強以言志在大不在小也

今秦攻趙戰勝則兵

罷我承其敝不勝則我引兵鼓行而西必舉秦矣故不

如先鬪秦趙夫被堅執銳義不如公坐而運策公不如

義因下令軍中曰猛如虎很如羊正義很何慙反貪如狼彊不

可使者皆斬之乃遣其子宋襄相齊身送之至無鹽索隱

按地理志東平郡之縣在今鄆州之東

飲酒高會

集解韋昭曰皆召尊爵故云高索隱服虔云高

會大會也

天寒大雨士卒凍飢項羽曰將戮力而攻秦久留

不行今歲饑民貧士卒食芋菽

集解徐廣曰芋一作半半五升器也駟按瓚曰

士卒食蔬菜以菽雜半之索隱芋蹲鴟也菽豆也臣瓚  
義亦通漢書作半菽王劭曰言半量器名容半升也

軍無見糧

正義胡練反顏監云無見在之糧

乃飲酒高會不引兵渡河

因趙食與趙并力攻秦乃曰承其敝夫以秦之彊攻新  
造之趙其勢必舉趙趙舉而秦彊何敝之承且國兵新  
破王坐不安席掃境內而專屬於將軍國家安危在此

一舉今不恤士卒而徇其私

索隱謂使其子相齊是徇其私情崔浩云徇營也

非社稷之臣項羽晨朝上將軍宋義即其帳中斬宋義  
頭出令軍中曰宋義與齊謀反楚楚王陰令羽誅之當



是時諸將皆懼服莫敢枝梧

集解如淳曰梧音悟枝梧猶枝捍也瓚曰小柱為枝

邪柱為梧今屋梧邪柱是也正義枝音之移反梧音悟

皆曰首立楚者將軍家也

今將軍誅亂乃相與共立羽為假上將軍

正義未得懷王命也假攝

也使人追宋義子及之齊殺之使桓楚報命於懷王懷

王因使項羽為上將軍

集解徐廣曰二世三年十一月

當陽君蒲將軍

皆屬項羽項羽已殺卿子冠軍威震楚國名聞諸侯乃

遣當陽君蒲將軍將卒二萬渡河

正義漳水

救鉅鹿戰少利

陳餘復請兵項羽乃悉引兵渡河皆沈船破釜燒廬

舍持三日糧以示士卒必死無一還心於是至則圍王

離與秦軍遇九戰絕其甬道大破之殺蘇角

集解文頴曰秦將也

虜王離涉閒不降楚自燒殺當是時楚兵冠諸侯諸侯

軍救鉅鹿下者十餘壁莫敢縱兵及楚擊秦諸將皆從

壁上觀楚戰士無不一以當十楚兵呼聲動天諸侯軍

無不人人惴恐

集解駟案漢書音義曰惴音章瑞反

於是已破秦軍項羽

召見諸侯將諸侯將入轅門

集解張晏曰軍行以車為陳棘相向為門故曰轅門

無不膝行而前莫敢仰視項羽由是始為諸侯上將軍

諸侯皆屬焉章邯軍棘原

集解張晏曰在漳南晉灼曰地名在鉅鹿南

項羽

軍漳南

正義括地志云濁漳水一名漳水今俗名柳河在邢州平鄉縣南注水經云漳水一名大漳水

兼有殺水之目也

相持未戰秦軍數却二世使人讓章邯章邯

恐使長史欣請事至咸陽留司馬門三日

集解駟案凡言司馬門者

宮垣之內兵衛所在四面皆有司馬主武事總言之外門為司馬門也索隱按天子門有兵欄曰司馬門也

趙高不見有不信之心長史欣恐還走其軍不敢出故

道

正義走音奏

趙高果使人追之不及欣至軍報曰趙高用

事於中下無可為者今戰能勝高必疾妒吾功戰不能

勝不免於死願將軍孰計之陳餘亦遺章邯書曰白起

為秦將南征鄢郢北阮馬服

索隱韋彤云趙奢子括也代號馮服崔浩云馬服趙

官名言服武事

攻城畧地不可勝計而竟賜死蒙恬為秦將北

逐戎人開榆中地數千里

索隱服虔云金城縣所治蘇林曰在上郡崔浩云蒙恬樹

榆為塞也

竟斬陽周

集解孟康曰縣名地屬上郡正義括地志云寧州羅川縣在州東南七十里漢

陽周縣

何者功多秦不能盡封因以法誅之今將軍為秦

將三歲矣所亡失以十萬數而諸侯並起滋益多彼趙

高素諛日久今事急亦恐二世誅之故欲以法誅將軍

以塞責使人更代將軍以脫其禍夫將軍居外久多內  
郤有功亦誅無功亦誅且天之亡秦無愚智皆知之今

將軍內不能直諫外為亡國將孤特獨立而欲常存豈

不哀哉將軍何不還兵與諸侯為從

索隱此諸侯謂關東諸侯也何以知

然文類曰關東為從關西為橫高誘曰關東地形從長蘇秦相六國號為合從關西地形橫長張儀相秦壞關

東從使與秦合號曰連橫

約共攻秦分王其地南面稱孤此孰與身

伏缺質妻子為僇乎

索隱公羊傳云加之缺質何休云要斬之罪崔浩云質斬人樞也又

郭註三蒼云質坐樞也

章邯狐疑陰使候始成

集解張晏曰候軍候索隱候軍候官

名始成  
其名

使項羽欲約未成項羽使蒲將軍日夜引兵

度三戶

集解服虔曰漳水津也張晏曰三戶地名在梁淇西南孟康曰津峽名也在鄴西三十里索隱

水經注云漳水東經三戶峽為三戶津也淇當為淇按晉八王故事云王浚伐鄴前至梁淇孟康云在鄴西四十里又關駟十三州志云鄴北五十里梁期故縣也字又不同軍漳南與秦戰再破之

項羽悉引兵擊秦軍汙水上

集解徐廣曰在鄴西索隱汙音于郡國志鄴縣有汙

城鄴元云汙水出武安山東南經汙城北入漳正義括地志云汙水源出懷州河內縣北大行山又云故邗城在河內縣西北二十七里古邗國地也左傳云邗晉應韓武之穆也大破之章邯使人見

項羽欲約項羽召軍吏謀曰糧少欲聽其約軍吏皆曰

善項羽乃與期洹水南殷虛上

集解徐廣曰二世三年七月也駟按應劭曰洹

水在湯陰界殷虛故殷都也瓚曰洹水在今安陽縣北去朝歌殷都一百五十里然則此殷虛非朝歌也汲冢

古文曰盤庚遷於北冢曰殷虛南去鄴三十里是舊殷虛然則朝歌非盤庚所遷者索隱按釋例云洹水出

汲郡林慮縣東北至長樂入清水是也汲冢古文云盤庚自奄遷于北冢曰殷虛南去鄴州三十里是殷虛南

舊地名號北冢也已盟章邯見項羽而流涕為言趙高項羽乃

立章邯為雍王置楚軍中使長史欣為上將軍將秦軍

為前行到新安正義括地志云新安故城在洛川澠池縣東一十三里漢新安縣城也即抗秦

卒處諸侯吏卒異時故繇使屯戍過秦中秦中吏卒遇之

多無狀及秦軍降諸侯諸侯吏卒乘勝多奴虜使之輕折辱秦吏卒秦吏卒多竊言曰章將軍等詐吾屬降諸侯今能入關破秦大善即不能諸侯虜吾屬而東秦必盡誅吾父母妻子諸將微聞其計以告項羽項羽乃召黥布蒲將軍計曰秦吏卒尚衆其心不服至關中不聽事必危不如擊殺之而獨與章邯長史欣都尉翳入秦於是楚軍夜擊阬秦卒二十餘萬人新安城南

集解徐廣曰漢

元年十一月

行略定秦地函谷關有兵守關不得入

集解文穎曰時



關在弘農縣衡山嶺今移在河南穀城縣索隱顏師古云今桃林縣南有洪溜澗水即古之函關按山形如函故稱函關正義括地志云函谷關在陝州桃林縣西南十二里秦函谷關也圖記云西去長安四百餘里路在谷中故以為名 又聞沛公已破咸陽項羽大怒使當陽君等擊

關項羽遂入至于戲西沛公軍霸上未得與項羽相見

沛公左司馬曹無傷使人言於項羽曰沛公欲王關中

使子嬰為相珍寶盡有之項羽大怒曰旦日饗士卒為

擊破沛公軍當是時項羽兵四十萬在新豐鴻門集解孟康

曰在新豐東十七里舊大道北下阪口名沛公兵十萬在霸上范增說項羽

曰沛公居山東時貪於財貨好美姬今入闕財物無所  
取婦女無所幸此其志不在小吾令人望其氣皆為龍  
虎成五采此天子氣也急擊勿失楚左尹項伯者項羽

季父也

索隱名經字伯  
後封射陽侯

素善留侯張良張良是時從沛

公項伯乃夜馳之沛公軍私見張良具告以事欲呼張

良與俱去曰毋從俱死也張良曰臣為韓王送沛公

正義

為于  
偽反

沛公今事有急亡去不義不可不語良乃入具告

沛公沛公大驚曰為之奈何張良曰誰為大王為此計

者曰鰕生說我曰距關毋內諸侯秦地可盡王也故聽

之

集解徐廣曰鰕音士垢反魚名駟案服虔曰鰕音淺鰕小人貌也瓚曰楚漢春秋鰕姓也

良曰料

大王士卒足以當項王乎沛公默然曰固不如也且為之奈何張良曰請往謂項伯言沛公不敢背項王也沛公曰君安與項伯有故張良曰秦時與臣游項伯殺人臣活之今事有急故幸來告良沛公曰孰與君少長良曰長於臣沛公曰君為我呼入吾得兄事之張良出要項伯項伯即入見沛公沛公奉卮酒為壽約為婚姻曰

吾入關秋毫不敢有所近籍吏民封府庫而待將軍所以遣將守關者備他盜之出入與非常也日夜望將軍至豈敢反乎願伯具言臣之不敢倍德也項伯許諾謂沛公曰旦日不可不蚤自來謝項王沛公曰諾於是項伯復夜去至軍中具以沛公言報項王因言曰沛公不先破關中公豈敢入乎今人有大功而擊之不義也不如因善遇之項王許諾沛公旦日從百餘騎來見項王至鴻門謝曰臣與將軍戮力而攻秦將軍戰河北臣戰

河南然不自意能先入闕破秦得復見將軍於此今者  
有小人之言令將軍與臣有郤項王曰此沛公左司馬  
曹無傷言之不然籍何以至此項王即日因留沛公與

飲項王項伯東嚮坐亞父南嚮坐亞父者范增也

集解  
如淳

曰亞次也尊敬之次  
父猶管仲為仲父

沛公北嚮坐張良西嚮侍范增數

目項王舉所佩玉玦以示之者三項王默然不應范增

起出召項莊

正義項  
羽從弟

謂曰君王為人不忍若入前為壽

壽畢請以劍舞因擊沛公於坐殺之不者若屬皆且為

所虜莊則入為壽壽畢曰君王與沛公飲軍中無以為樂請以劍舞項王曰諾項莊拔劍起舞項伯亦拔劍起舞常以身翼蔽沛公莊不得擊於是張良至軍門見樊噲樊噲曰今日之事何如良曰甚急今者項莊拔劍舞其意常在沛公也噲曰此迫矣臣請入與之同命噲即

帶劍擁盾入軍門

正義擁紆拱反盾食允反

交戟之衛士欲止不內

樊噲側其盾以撞

正義撞直江反

衛士仆地噲遂入披帷西嚮

立瞋目視項王

正義瞋昌真反

頭髮上指目眦盡

正義眦自賜反

項

王按劔而跽曰

索隱其紀  
及謂長跽

客何為者張良曰沛公之參

乘樊噲者也項王曰壯士賜之卮酒則與斗卮酒噲拜

謝起立而飲之項王曰賜之彘肩則與一生彘肩樊噲

覆其盾於地加彘肩上拔劔切而啗之

索隱啗徒覽反  
凡以食餒人則

去聲自食  
則上聲

項王曰壯士能復飲乎樊噲曰臣死且不避

卮酒安足辭夫秦王有虎狼之心殺人如不能舉刑人  
如恐不勝天下皆叛之懷王與諸將約曰先破秦入咸  
陽者王之今沛公先破秦入咸陽毫毛不敢有所近封

閉宮室還軍霸上以待大王來故遣將守關者備他盜  
出入與非常也勞苦而功高如此未有封侯之賞而聽  
細說欲誅有功之人此亡秦之續耳竊為大王不取也  
項王未有以應曰坐樊噲從良坐坐須臾沛公起如廁  
因招樊噲出沛公已出項王使都尉陳平

集解徐廣曰  
一本無都字

召沛公沛公曰今者出未辭也為之奈何樊噲曰大行  
不顧細謹大禮不辭小讓如今人方為刀俎我為魚肉  
何辭為於是遂去乃令張良留謝良問曰大王來何操



曰我持白璧一雙欲獻項王玉斗一雙欲與亞父會其怒不敢獻公為我獻之張良曰謹諾當是時項王軍在鴻門下沛公軍在霸上相去四十里沛公則置車騎脫

身獨騎與樊噲夏侯嬰斬彊紀信等

索隱漢書作紀通通紀成之子

四

人持劔盾步走從酈山下道芷陽間行沛公謂張良曰從此道至吾軍不過二十里耳度我至軍中公乃入沛公已去間至軍中張良入謝曰沛公不勝枵枵不能辭謹使臣良奉白璧一雙再拜獻大王足下玉斗一雙再

拜奉大將軍足下項王曰沛公安在良曰聞大王有意

督過之脫身獨去已至軍矣

集解如淳曰脫身逃還其軍

項王則受

壁置之坐上亞父受玉斗置之地拔劍撞而破之曰唉

集解徐廣曰唉烏來反索隱音虛其反皆歎恨發聲之辭

豎子不足與謀奪項王天

下者必沛公也吾屬今為之虜矣沛公至軍立誅殺曹

無傷居數日項羽引兵西屠咸陽殺秦降王子嬰燒秦

宮室火三月不滅收其貨寶婦女而東人或說項王曰

關中阻山河四塞

集解徐廣曰東函谷南武關西散關北蕭關

地肥饒可都

以霸項王見秦宮室皆以燒殘破又心懷思欲東歸曰

富貴不歸故鄉如衣繡夜行誰知之者說者曰人言楚

人沐猴而冠耳果然

集解張晏曰沐猴獼猴也索隱言獼猴不任久著冠帶以喻楚人性

躁暴果然言果如人言也

項王聞之烹說者

集解駟案楚漢春秋揚子法言云說者是蔡生

漢書云是韓生

項王使人致命懷王懷王曰如約乃尊懷王為

義帝項王欲自王先王諸將相謂曰天下初發難時

集解

服虔曰兵初起時正義難乃憚反

假立諸侯後以伐秦然身被堅執銳

首事暴露於野

正義暴蒲北反

三年滅秦定天下者皆將相諸

君與籍之力也義帝雖無功故當分其地而王之諸將

皆曰善乃分天下立諸將為侯王項王范增疑沛公之

有天下業已講解

集解蘇林曰講和也索隱服虔云解折伏也說文云講和講也漢書作媾

解蘇林云媾和也是媾之與講俱訓和也業事也言雖有疑心然事已和解也

又惡負約恐諸

侯叛之乃陰謀曰巴蜀道險秦之遷人皆居蜀乃曰巴

蜀亦關中地也故立沛公為漢王

集解徐廣曰以正月立

王巴蜀

漢中都南鄭

正義括地志云南鄭梁州所理縣也

而三分關中王秦降將

以距塞漢王項王乃立章邯為雍王王咸陽以西都廢

邱

索隱孟康曰縣名今槐里是也韋昭曰周時名犬邱懿王所都秦欲廢之故曰廢邱正義括地志云犬邱

故城一名廢邱古城在雍州始平縣東南十里地理志云漢高二年引水灌廢邱章邯自殺更廢邱曰槐里

長史欣者故為櫟陽獄掾嘗有德於項梁都尉董翳者

本勸章邯降楚故立司馬欣為塞王

集解韋昭曰在長安東名桃林塞

王咸陽以東至河都櫟陽

集解蘇林曰櫟音藥正義括地志云櫟陽故城一名萬年

城在雍州櫟陽東北二十五里秦獻公之城櫟陽即此也

立董翳為翟王王上郡都

高奴

集解文穎曰上郡秦所置項羽以董翳為翟王更名高奴按今鄜州有高奴城正義括地志云

延州州城即

徙魏王豹為西魏王王河東都平陽瑕邱

漢高奴縣

申陽者

集解徐廣曰一云瑕邱公也服虔曰瑕邱縣屬山陽申姓陽名文穎曰姓瑕邱字申陽璣曰瑕

邱公申陽是瑕邱縣名

張耳嬖臣也先下河南郡迎楚河上故立

申陽為河南王都雒陽

正義括地志云洛陽故城在洛州洛陽縣東北二十六里周公

所築即成周城也輿地志云成周之地秦莊襄王以為洛陽縣三川守理之後漢都洛陽改為雒漢以火德忌水故去洛旁水而加佳魏於行次為土土水之忌也水得土而流土得水而柔故除佳以加水韓王成

因故都都陽翟

正義括地志云陽翟洛州縣也左傳云鄭伯突入于櫟杜預云櫟鄭別都今河

南陽翟縣是也地理志云陽翟縣是屬潁川郡夏禹之國

趙將司馬卬定河內數有

功故立卬為殷王王河內都朝歌徙趙王歇為代王趙

相張耳素賢又從入關故立耳為常山王王趙地都襄

**國**

正義括地志云邢州城本漢襄國縣秦置三十六郡於此置信都縣屬鉅鹿郡項羽改曰襄國立張耳為

常山王理信都地理志云故邢侯國也帝王世紀云邢侯為紂三公以忠諫被誅史記云周武王封周公旦之

子為邢侯左傳云凡蔣邢茅周公之胤也

當陽君黥布為楚將常冠軍故立

布為九江王都六

正義括地志云故六城在壽州安豐縣南百三十二里本六國偃姓皐繇

之後所封也黥布亦皐繇之後居六也

鄱君吳芮率百越佐諸侯又從入

關故立芮為衡山王都邾

集解韋昭曰鄱音蒲河反初吳芮為鄱令故號曰鄱君今

鄱陽縣是也文穎曰邾音朱縣名屬江夏正義鄱作音婆說文云邾音誅括地志云故邾城在黃州黃岡縣

東南二十里本春秋時邾國邾子曹姓狹居至魯隱公徙斬音機

義帝柱國共敖正義共音

恭將兵擊南郡功多因立敖為臨江王都江陵集解駟案漢書

音義曰本南郡改為臨江國正義江陵荆州縣史記江陵故郢都也徙燕王韓廣為遼東

王集解徐廣曰都無終燕將臧荼徙楚救趙因徙入關故立荼為

燕王都薊徙齊王田市為膠東王集解徐廣曰都即墨正義括地志云即墨

故城在萊州膠水縣南六十里古齊地本漢舊縣膠音交在膠水之東齊將田都徙共敖

趙因徙入關故立都為齊王都臨菑索隱按高紀及田儋傳云臨濟此言

臨菑誤正義菑側其反括地志云青州臨菑縣地即古臨菑地也一名齊城古營邱之地所封齊之都也少昊



時有奕鳩氏。虞夏時有季荊。殷時有逢伯陵。殷末有薄姑氏。為諸侯國。此地後太公封方五百里。故秦

所滅。齊王建孫田安。項羽方渡河救趙。田安下濟北。數

城引其兵降項羽。故立安為濟北王。都博陽。正義在濟北田

榮者數負項梁。又不肯將兵從楚擊秦。以故不封。成安

君。正義案地理志云成安縣在潁川郡屬豫州陳餘棄將印去不從。入關。然

素聞其賢。有功於趙。聞其在南皮。故因環封三縣。集解案

漢書音義曰。繞南皮三縣以封之。正義括地志云。故南皮城在滄州南皮縣北四里。本漢皮縣城。即陳餘所封

也。番君將梅鋗。集解韋昭曰呼玄反功多。故封十萬戶。侯項王自

立為西楚霸王

正義貨殖傳云淮南北沛郡汝南郡為西楚也彭城以東東海吳廣陵為東楚

也衡山九江南豫章長沙為南楚

王九郡都彭城

集解孟康曰舊名江陵為南楚吳為東楚

彭城為西楚正義彭城徐州縣

漢之元年四月諸侯罷戲下各就國

索隱

戲音羲水名也言下者如許下洛下然也按上文云項羽入至戲西鴻門沛公還軍霸上是羽初停軍於戲水

下今言諸侯罷戲下是各受封邑號令訖自戲下各就國何須假借文字以為旌麾之下乎顏師古劉伯莊之

非說皆項王出之國使人徙義帝曰古之帝者地方千里

必居上游

集解文穎曰居水上流也游或作流

乃使使徙義帝長沙郴

縣

集解如淳曰郴音緄趣義帝行其羣臣稍稍背叛之乃陰令衡

山臨江王擊殺之江中

集解文類曰郴縣有義帝冢歲時常祠不絕

韓王成

無軍功項王不使之國與俱至彭城廢以為侯已又殺

之臧荼之國因逐韓廣之遼東廣弗聽荼擊殺廣無終

并王其地田榮聞項羽徙齊王市膠東而立齊將田都

為齊王乃大怒不肯遣齊王之膠東因以齊反迎擊田

都田都走楚齊王市畏項王乃亡之膠東就國田榮怒

追擊殺之即墨榮因自立為齊王而西擊殺濟北王田

安并王三齊

集解 駟案漢書音義曰齊與濟北膠東正義三齊記云右即墨中臨淄左平陸謂之

三齊榮與彭越將軍印令反梁地陳餘陰使張同夏說說齊王田榮曰項羽為天下宰不平今盡王故王於醜地而王其羣臣諸將善地逐其故主趙王乃北居代餘以為不可聞大王起兵且不聽不義願大王資餘兵請以擊常山以復趙王請以國為扞蔽齊王許之因遣兵之趙陳餘悉發三縣兵與齊并力擊常山大破之張耳走歸漢陳餘迎故趙王歇於代反之趙趙王因立陳餘為代王是時漢還定三秦項羽聞漢王皆已并關中且東

齊趙叛之大怒乃以故吳令鄭昌為韓王以距漢令蕭

公角等

集解蘇林曰官號也或曰蕭令也時令皆稱公

擊彭越彭越敗蕭公角

等漢使張良徇韓乃遺項王書曰漢王失職欲得關中如約即止不敢東又以齊梁反書遺項王曰齊欲與趙并滅楚楚以此故無西意而北擊齊徵兵九江王布布稱疾不往使將將數千人行項王由此怨布也漢之二年冬項羽遂北至城陽田榮亦將兵會戰田榮不勝走至平原平原民殺之遂北燒夷齊城郭室屋皆阮田榮

降卒係虜其老弱婦女徇齊至北海多所殘滅齊人相聚而叛之於是田榮弟田橫收齊亡卒得數萬人反城

陽項王因留連戰未能下春漢王部

集解徐廣曰一作劫索隱按漢書作

劫五諸侯兵

集解徐廣曰塞翟魏殷河南嗣按應劭曰雍翟塞殷韓也韋昭曰塞翟殷韓魏雍時

已敗也索隱按徐廣韋昭皆數翟塞及殷韓等顏師古不數三秦謂常山河南韓魏殷顧盾意畧同乃以陳餘兵為五未知孰是鄙意按韓王鄭昌拒漢使韓信擊破之則是韓兵不下而已破散也韓不在此數五諸侯者塞翟河南魏殷也正義師古云諸家之說皆非張良遺羽書曰漢王欲得關中如約即止不敢復東謂出關之東也今羽乃聞漢王東之時漢固已得三秦矣五諸侯者謂常山河南韓魏殷也此年十月常山王張耳降

河南王申陽降韓王鄭昌降魏王豹降虜殷王卬皆漢東之後故知謂此為五諸侯時雖未得常山之地功臣年表云張耳棄國與大臣歸漢則當亦有士卒爾時雍王猶在廢邱被圍即非五諸侯之數也尋此紀文昭然可曉前賢注釋並失指趣高紀及漢書皆言劫五諸侯兵凡兵初降士卒未有自指麾故須劫略而行又云發關中兵收三河士發謂差黥撥發也收謂劫略收斂也韋昭云河南河東河內申陽都雒陽韓王成都陽翟皆河南也魏豹都平陽河東也司馬印都朝歌張耳都襄國河內也此三河士則五諸侯兵也更著雍塞翟則成八諸侯矣重明顏公之說是故韓信傳云凡五十六萬漢二年出關收魏河南韓殷王皆降是

人東伐楚項王聞之即令諸將擊齊而自以精兵三萬

人南從魯出胡陵正義括地志云徐州魯兗州曲阜縣也地理志云胡陵在山陽縣屬也

四月漢皆已入彭城收其貨寶美人日置酒高會項王

乃西從蕭

正義括地志云徐州蕭縣古蕭叔之國春秋時為宋附庸帝王世紀云周封子姓之別為

附庸也

晨擊漢軍而東至彭城日中大破漢軍

集解張晏曰一日之

中也或曰旦擊之至日中大破

漢軍皆走相隨入穀泗水

集解瓚曰二水皆在沛郡

彭城

殺漢卒十餘萬人漢卒皆南走山

正義走音奏

楚又追擊

至靈壁東

集解徐廣曰在彭城索隱孟康曰故小縣在彭城南正義括地志云靈壁故城在徐州符

離縣西北九十里

睢水上

集解徐廣曰睢水於彭城入泗水正義睢音雖括地志云睢水首受浚儀

縣葭蕩水東經取慮入泗過郡其西行至一千二百六十里者矣

漢軍却為楚所擠

集解



服虔曰擠音濟民  
之濟瓚曰排擠也

多殺漢卒十餘萬人皆入睢水睢水

為之不流

正義為  
于偽反

圍漢王三匝於是大風從西北而起

折木發屋揚沙石窈冥晝晦

集解徐廣曰  
窈亦作窈字

逢迎楚軍楚

軍大亂壞散而漢王乃得與數十騎遁去欲過沛收家

室而西楚亦使人追之沛取漢王家家皆亡不與漢王

相見漢王道逢得孝惠魯元

集解服虔曰元長也食  
邑於魯韋昭曰元謚也

乃

載行楚騎追漢王漢王急推墮孝惠魯元車下滕公常

下收載之如是者三曰雖急不可以驅奈何棄之於是

遂得脫求太公呂后不相遇甯食其從太公呂后間行

求漢王

集解瓚曰其音基如淳曰間出間步微行皆同義也索隱食音異按鄴甯趙三人同名其音合

並同以六國時衛有司馬食其並慕其名

反遇楚軍楚軍遂與歸報項王項

王常置軍中是時呂后兄周呂侯

集解徐廣曰名澤正義蘇林云以姓名侯

也晉灼云外戚表周呂令武侯澤也呂縣名封於呂以爲國顏師古云周呂封名令武其謚也蘇云以姓名侯

非也為漢將兵居下邑

集解徐廣曰在梁正義括地志云宋州碭山縣本下邑縣也在宋州

東一百五十里按今下邑在宋州東一百一十里

漢王間往從之稍稍收其士

卒至滎陽諸敗軍皆會蕭何亦發關中老弱未傅悉詣

榮陽

集解服虔曰傳音附孟康曰古者二十而傳三年耕有一年儲故二十三年而後役之如淳曰律年

二十三傳之疇官各徙其父疇內學之高不滿六尺二寸以下為罷癯漢儀註民年二十三為正一歲為衛士一歲為材官騎士習射御騎馳戰陣又曰年五十六衰老乃得免為庶民就田里今老弱未嘗傳者皆發之未二十三為弱過五十六為老食貨志曰月為更卒已復為正一歲屯戍一歲力役三十倍於古者索隱按姚氏云古者更卒不過一月踐更五月而休文穎云五當為三言一歲之中三月居更三日戍邊總九十三日古者役人歲不過三日此所謂一歲力役三十倍於古也斯說得之  
**復大振楚起於彭城常**

**乘勝逐北與漢戰榮陽南京索間漢敗楚**

集解應劭曰京縣名屬河

南有索亭晉灼曰索音柵正義括地志云京縣城在鄭州榮陽縣東南二十里鄭之京邑也晉太康地志云鄭

太叔段所居邑榮陽縣即大索城杜預云成畢東有大索城又有小索故城在榮陽縣北四里京相璠地名云京縣有大索亭小索亭大小氏兄弟居之故有小大之號按楚與漢戰榮陽南京索間即此三城耳楚以

故不能過榮陽而西項王之救彭城追漢王至榮陽田

橫亦得收齊立田榮子廣為齊王漢王之敗彭城諸侯

皆復與楚而背漢漢軍榮陽築甬道屬之河以取敖倉

粟

集解瓚曰敖地名在榮陽西北山臨河有太倉正義括地志云敖倉在鄭州榮陽縣西十五里縣門之東

北臨汴水南帶三皇山秦時置倉于敖山名敖倉云漢之三年項王數侵奪漢甬

道漢王食乏恐請和割榮陽以西為漢項王欲聽之歷

陽侯范增曰

正義括地志云和州歷陽縣本漢舊縣也淮南子云歷陽之都一夕而為湖漢帝時

歷陽淪為歷湖

漢易與耳今釋弗取後必悔之項王乃與范增

急圍滎陽漢王患之乃用陳平計間項王項王使者來

為太牢具舉欲進之見使者詳驚愕曰吾以為亞父使

者乃及項王使者更持去以惡食食項王使者

正義上食如字

下音寺

使者歸報項王項王乃疑范增與漢有私稍奪之

權范增大怒曰天下事大定矣君王自為之願賜骸骨

歸卒伍項王許之行未至彭城疽發背而死

集解駢案皇覽曰亞

父冢在廬江居巢縣郭東居巢廷中有亞父井吏民皆祭亞父於居巢廷上長吏初視事皆祭然後徙政後更造祠於郭東至今祠之正義疽七餘反崔浩云疽附骨癰也括地志云髑髏山在廬川巢縣東北五里昔范增居此山之陽

後佐項羽

漢將紀信說漢王曰事已急矣請為王誑

楚為王王可以間出於是漢王夜出女子滎陽東門被

甲二千人楚兵四面擊之紀信乘黃屋

正義李斐云天子車以黃繒為

蓋車傳左纛

集解李斐曰纛毛羽幢也在乘輿車衡左方上注之蔡邕曰以犛牛尾為之如斗或

在駢頭或在衡上也

曰城中食盡漢王降楚軍皆呼萬歲漢王亦

與數十騎從城西門出走成臯

正義括地志云成臯故縣在洛州汜水縣西南

二項王見紀信問漢王安在信曰漢王已出矣項王燒

殺紀信漢王使御史大夫周苛樅公

集解駢案樅音七徒反

魏豹

守滎陽周苛樅公謀曰反國之王難與守城乃共殺魏

豹楚下滎陽城生得周苛項王謂周苛曰為我將我以

公為上將軍封三萬戶周苛罵曰若不趣降漢漢今虜

若若非漢敵也項王怒烹周苛并殺樅公漢王之出滎

陽南走宛葉得九江王布行收兵復入保成臯漢之四

年項王進兵圍成臯漢王逃

集解晉灼曰獨出意索隱音徒凋反漢書作跳字

獨與滕公出成臯北門

集解徐廣曰北門名玉門

渡河走脩武從張

耳韓信軍諸將稍稍得出成臯從漢王楚遂拔成臯欲

西漢使兵距之鞏令其不得西是時彭越渡河擊楚東

阿殺楚將軍薛公項王乃自東擊彭越漢王得淮陰侯

兵欲渡河南鄭忠說漢王乃止壁河內使劉賈將兵佐

彭越燒楚積聚

正義積音積賜反

項王東擊破之走彭越漢王

則引兵渡河復取成臯軍廣武就敖倉食項王已定東

海來西與漢俱臨廣武而軍

集解孟康曰於滎陽築兩城相對為廣武在敖倉西



三皇山上正義括地志云東廣武西廣武在鄭州滎陽縣西二十里戴延之側西征記云三皇山上有二城東曰東廣武西曰西廣武各在一山頭相去百步汴水從廣潤中東南流今潤無水城各有三面在教倉西郭緣生述征記云一潤橫絕上過名曰廣武相對皆立城塹遂號東西廣武

相守數月當此時

彭越數反梁地絕楚糧食項王患之為高俎置太公其

上

集解如淳曰高俎几之上李奇曰軍中巢櫓方面人謂之俎也索隱俎亦机之類故夏侯湛新論為机机

猶俎也比太公於牲內故置之俎上姚察按左氏楚子登巢車以望晉軍杜預謂車上櫓也故李氏云軍中巢櫓又引時人亦謂此為俎也正義括地志云東廣武城有高壇即是項羽坐太公俎上者今名項羽堆亦呼為太公亭顏師古云俎者所以薦肉示欲烹之故置俎上

告漢王曰今不急下吾烹

太公漢王曰吾與項羽俱北面受命懷王曰約為兄弟  
吾翁即若翁必欲烹而翁則幸分我一桮羹項王怒欲  
殺之項伯曰天下事未可知且為天下者不顧家雖殺  
之無益祇益禍耳項王從之楚漢久相持未決丁壯苦  
軍旅老弱罷轉漕項王謂漢王曰天下匈匈數歲者徒  
以吾兩人耳願與漢王挑戰集解李奇曰挑身獨戰不復須衆也挑音茶了反瓚  
曰挑戰挑敵敵求戰古謂之致師決雌雄毋徒苦天下之民父子為也  
漢王笑謝曰吾寧關智不能關力項王令壯士出挑戰

漢有善騎射者樓煩

集解應劭曰樓煩胡也今樓煩縣

楚挑戰三合樓

煩輒射殺之項王大怒乃自被甲持戟挑戰樓煩欲射

之項王瞋目叱之樓煩目不敢視手不敢發遂走還入

壁不敢復出漢王使人間問之乃項王也漢王大驚於

是項王乃即漢王相與臨廣武間而語漢王數之項王

怒欲一戰漢王不聽項王伏弩射中漢王漢王傷走入

成臯項王聞淮陰侯已舉河北破齊趙且欲擊楚乃使

龍且

集解韋昭曰音子閻反

往擊之淮陰侯與戰騎將灌嬰擊之

大破楚軍殺龍且韓信因自立為齊王項王聞龍且軍破則恐使盱台人武涉往說淮陰侯淮陰侯弗聽是時彭越復反下梁地絕楚糧項王乃謂海春侯大司馬曹咎等曰謹守成臯則漢欲挑戰慎勿與戰毋令得東而已我十五日必誅彭越定梁地復從將軍乃東行擊陳

留

正義括地志云陳留汴州縣也在州東五十里本漢陳留郡及陳留縣之地孟康云留鄭邑也後為陳所

并故曰陳留臣瓚又按宋有留彭城留是也此留屬陳故曰陳留

外黃外黃不下數日

已降項王怒悉令男子年十五已上詣城東欲阬之外

黃令舍人兒年十三

集解蘇林曰令之舍人兒也瓚曰稱兒者以其幼弱故係其父春秋

傳曰仍叔之子是也

往說項王曰彭越彊劫外黃

正義彊其兩及

外黃恐

故且降待大王大王至又皆阮之百姓豈有歸心從此

以東梁地十餘城皆恐莫肯下矣項王然其言乃赦外

黃當阮者東至睢陽

正義括地志云宋州外城本漢睢陽縣也地理志云睢陽縣故宋國

也聞之皆爭下項王漢果數挑楚軍戰楚軍不出使人

辱之五六日大司馬怒渡兵汜水

集解張晏曰汜水在濟陰界如淳曰汜音

祀左傳曰鄙在鄭地汜瓚曰高祖攻曹咎成臯汜水而戰今成臯城東汜水是也索隱案今此水見名汜水

音似張晏云在濟陰亦未全失按古濟水當此截河而南又東流溢為滎澤然水南曰陰此亦在濟之陰非彼濟陰郡耳臣瓚之說是正義括地志云汜水源出洛州汜水縣東南三十二里方山山海經云浮戲之山汜水

出馬士卒半渡漢擊之大破楚軍盡得楚國貨賂大司馬

咎長史翳塞王欣皆自剄汜水上

集解鄭玄曰剄音經鼎反以刀割頸為剄

大司馬咎者故斬獄掾長史欣亦故櫟陽獄吏兩人嘗

有德於項梁是以項王信任之當是時項王在睢陽聞

海春侯軍敗則引兵還漢軍方圍鍾離昧於滎陽東

集解

翳案漢書音義曰昧音未

項王至漢軍畏楚盡走險阻是時漢兵盛

食多項王兵罷食絕漢遣陸賈說項王請太公項王弗

聽漢王復使侯公往說項王項王乃與漢約中分天下

割鴻溝以西者為漢

集解文穎曰於滎陽下引河東南為鴻溝以通宋鄭陳蔡曹衛與濟

汝淮泗會於楚即今官渡水也正義應劭云在滎陽東二十里張華云大梁城在浚儀縣北縣西北渠水東經此城南又北屈分為二渠其一渠東南流始皇鑿引河水以灌大梁謂之鴻溝楚漢會此處也其一渠東經陽武縣南為官渡水

按張華此說是

鴻溝而東者為楚項王許之即歸漢

王父母妻子軍皆呼萬歲漢王乃封侯公為平國君

正義

楚漢春秋云上欲封之乃肯見曰此天下之辨士所居傾國故號曰平國君按說歸太公呂后能和平郡國

匿弗肯復見曰此天下辯士所居傾國故號為平國君

項王已約乃引兵解而東歸漢欲西歸張良陳平說曰

漢有天下太半

集解韋昭曰凡數三分有二為太半一為少半

而諸侯皆附之

楚兵罷食盡此天亡楚之時也不如因其機而遂取之

今釋弗擊此所謂養虎自遺患也

正義遺唯季反

漢王聽之漢

五年漢王乃追項王至陽夏南

集解如淳曰夏音賈正義括地志云陳州太康

縣本漢陽夏縣也續漢書郡國志云陽夏縣屬陳國按太康縣城夏后太康所築隋改陽夏為太康

止軍

與淮陰侯韓信建成侯彭越期會而擊楚軍至固陵

集解



徐廣曰在陽夏駟按晉灼曰即固始也正義括地志云固陵縣名也在陳州宛邱縣西北四十二里而信

越之兵不會楚擊漢軍大破之漢王復入壁深塹而自

守謂張子房曰諸侯不從約為之奈何對曰楚兵且破

信越未有分地集解李奇曰信越等未有益地之分也韋昭曰信等雖名為王未有所畫經界

其不至固宜君王能與共分天下今可立致也即不能

事未可知也君王能自陳以東傅海盡與韓信正義傅音附著

也陳即陳州古陳國都也自陳著睢陽以北至穀城以

與彭越正義括地志云穀城故在齊州東阿縣東二十里睢陽宋州也自宋州以北至濟州穀城際

黃河盡與相國彭越

使各自為戰

正義為于偽反

則楚易敗也漢王曰善

於是乃發使者告韓信彭越曰并力擊楚楚破自陳以

東傅海與齊王睢陽以北至穀城與彭相國使者至韓

信彭越皆報曰請今進兵韓信乃從齊往劉賈軍從壽

春並行屠城父

集解如淳曰並行並擊之正義父音甫壽州壽春縣也城父亳州縣也屠謂多

刑殺也劉賈入圍壽州引兵過淮北屠殺亳州城父而東北至垓下

至垓下

集解徐廣曰在沛之汶縣

汶下交切駟按應劭曰垓音該李奇曰沛汶縣聚邑名也索隱張揖三蒼注云垓堤名在沛郡正義按垓下是

高岡絕巖今猶高三四丈其聚邑及堤在垓之側因取名焉今在亳州真源縣東十里與老君相接汶音戶交

反大司馬周殷叛楚以舒屠六集解如淳曰以舒之衆屠破六縣正義括地志

云舒今廬江則故舒城是也故六城在壽州安豐南百三十二里匡姓咎繇之後按周殷叛楚兼舉九江郡之

兵隨劉賈正義九江郡壽州也楚考烈王二而至於下十二年自陳徙壽春號云郢至王

負芻為秦將王翦蒙武所滅於是置九隨劉賈彭越皆江郡應劭云自廬江尋陽分為北江

會垓下詣項王項王軍壁垓下兵少食盡漢軍及諸侯

兵圍之數重夜聞漢軍四面皆楚歌集解應劭曰楚歌者謂鷓鴣鳴歌也漢

已略得其地故楚歌者多鷓鴣鳴時歌也正義顏師古云楚人之歌也猶言吳謳越吟若鷓鴣鳴為歌之名於理則

可不得云鷓鴣鳴時也高祖戚夫人楚舞項王乃大驚曰自為楚歌豈亦鷓鴣鳴時乎按顏說是也

漢皆已得楚乎是何楚人之多也項王則夜起飲帳中

有美人名虞

集解徐廣曰一云姓虞氏正義括地志云虞姬墓在涿州定遠縣東六十里長老傳

云項羽美人家也

常幸從駿馬名騅

正義音佳顧野王云青白色也釋畜云蒼白雜毛騅

也常騎之於是項王乃悲歌忼慨自為詩曰力拔山兮

氣蓋世時不利兮騅不逝騅不逝兮可奈何虞兮虞兮

奈若何歌數闋美人和之

正義和音胡臥反楚漢春秋云歌曰漢兵已畧地四方楚

歌聲大王意氣盡賤妾何聊生

項王泣數行下

正義數色度反行色郎反

左右皆泣

莫能仰視於是項王乃上馬騎

正義其倚反凡單乘曰騎後同

麾下

正義

鹿亦作戲  
同呼危反

壯士騎從者八百餘人直夜潰圍南出馳走

平明漢軍乃覺之令騎將灌嬰以五千騎追之項王渡

淮騎能屬者百餘人耳

正義屬音燭

項王至陰陵

集解徐廣曰在淮南

正義括地志云陰陵縣故城在濠州定遠縣西北六十里地理志云陰陵縣屬九江郡

迷失道問

一田父田父給曰左

集解文穎曰給欺也欺令左去

左乃陷大澤中以

故漢追及之項王乃復引兵而東至東城

集解駟案漢書音義曰縣

名屬臨淮正義括地志云東城縣故城在濠州定遠縣東南五十里地理志云東城縣屬九江郡

乃有

二十八騎漢騎追者數千人項王自度不得脫謂其騎

曰吾起兵至今八歲矣身七十餘戰所當者破所擊者

服未嘗敗北遂霸有天下然今卒困於此

正義卒子律反

此天

之亡我非戰之罪也今日固決死願為諸君決戰必三

勝之為諸君潰圍斬將刈旗令諸君知天亡我非戰之

罪也乃分其騎以為四隊四嚮漢軍圍之數重項王謂

其騎曰吾為公取彼一將令四面騎馳下期山東為三

處

正義期過山東分為三處漢軍不知項羽處括地志云九頭山在滁州全椒縣西北九十六里江表傳云

項羽敗至烏江漢兵追羽至此一日九戰因名於是項王大呼

正義火故反

馳下漢

軍皆披靡

正義上坡彼反靡言精體低垂

遂斬漢一將是時赤泉侯為

騎將追項王項王瞋目叱之赤泉侯人馬俱驚辟易數

里

正義言人馬俱驚開張易舊處乃至數里

與其騎會為三處漢軍不知項

王所在乃分軍為三復圍之項王乃馳復斬漢一都尉

殺數十百人復聚其騎亡其兩騎耳乃謂其騎曰何如

騎皆伏曰如大王言於是項王乃欲東渡烏江

集解瓚曰在牛

者索隱按晉初屬臨淮正義括地志云烏江亭即和州烏江縣是也晉初為縣注水經云水又北左傳黃律口

漢書所謂烏江亭長檝船以待項羽即此也

烏江亭長檝船待

集解徐廣曰檝音儀一音

俄駟來應劭曰棹正也孟康曰棹音蟻附也附船著岸也如淳曰南方人謂整船向岸曰棹索隱棹字諸家各

以意解爾鄒誕本作樣船以尚反劉氏亦有此音

謂項王曰江東雖小地方千

里衆數十萬人亦足王也願大王急渡今獨臣有船漢

軍至無以渡項王笑曰天之亡我我何渡為且籍與江

東子弟八千人渡江而西今無一人還縱江東父兄憐

而王我我何面目見之縱彼不言籍獨不愧於心乎乃

謂亭長曰吾知公長者吾騎此馬五歲

正義騎音奇

所當無

敵嘗一日行千里不忍殺之以賜公乃令騎皆下馬步



行持短兵接戰獨籍所殺漢軍數百人項王身亦被十

餘創顧見漢騎司馬呂馬童曰若非吾故人乎馬童面

之集解張晏曰以故人故難視斫之故背之如淳曰而不正視也指王翳曰此項王也

集解如淳曰指示王翳項王乃曰吾聞漢購我頭千金正義漢以一斤金為

一金當一萬錢也邑萬戶吾為若德集解徐廣曰亦可是功德之德正義為于偽反言呂

馬童與項羽先是故人舊有恩德於羽一云德行也乃自刎而死王翳取其頭餘

騎相蹂踐爭項王相殺者數十人最其後郎中騎楊喜

騎司馬呂馬童郎中呂勝楊武各得其一體五人共會

其體皆是分其地為五封呂馬童為中水侯

索隱按晉書地道記

其中水縣屬河間正義地理志云中水縣屬涿郡應劭云在易滙二水之中故曰中水

封王翳為

杜行侯

索隱按地理志縣在南陽按表作王翳也正義括地志云杜行侯故縣在鄧州南陽縣西八里

封楊喜為赤泉侯

索隱南陽有丹水縣疑亦泉後改按漢書表及後漢作憲音火志反

封

楊武為吳防侯

索隱地理志縣名屬汝南故房子國正義吳防豫州縣括地志云吳房縣本漢

舊縣孟康云吳王闔廬弟夫概奔楚楚封於此為堂谿氏本房子國以封吳故曰吳房

封呂勝為

涅陽侯

集解徐廣曰五人後卒皆謚壯侯索隱地理志南陽縣名正義涅陽年結反括地志云涅陽故地

城在鄧州穰縣東北六十里木漢舊縣也應劭云在涅水之陽

項王已死

集解徐廣曰漢五年之十

二月也項王以始皇十五年  
己巳歲生死時年三十一  
楚地皆降漢獨魯不下漢

乃引天下兵欲屠之為其守禮義為主死節乃持項王

頭示魯魯父兄乃降始楚懷王初封項籍為魯公及其

死魯最後下故以魯公禮葬項王穀城

集解駟案皇覽曰項羽冢在東

郟穀城東去縣十五里正義括地志云項羽墓在濟州東阿縣東二十七里穀城西三里述征記項羽墓在穀

城西北三里半許毀壞有碣石項王之墓漢王為發哀泣之而去諸項氏枝

屬漢王皆不誅乃封項伯為射陽侯

集解徐廣曰項伯名經字伯正義射

音食夜反括地志云楚州山陽本漢射陽縣吳地志云在射水之陽故曰射陽桃侯

集解徐廣曰名襄其

子舍為丞相正義括地志云故城在滑州胙城縣東四十里漢書云高祖十二年封劉襄為挑侯也

平臯

侯

集解徐廣曰名佗正義括地志云平臯故城在懷川武德縣東二十里漢平臯縣按佗音徒何反

玄

武侯

集解徐廣曰諸侯表中不見

皆項氏賜姓劉氏

太史公曰吾聞之周生曰

集解文穎曰周時賢者正義孔文祥云周生漢時儒者姓

周也按太史公云吾聞之周生則是漢人與太史公耳目相接明矣

舜目蓋重瞳子

集解駟按

尸子曰舜兩眸子是謂重瞳

又聞項羽亦重瞳子羽豈其苗裔邪何

興之暴也夫秦失其政陳涉首難豪傑蜂起相與並爭不可勝數然羽非有尺寸乘勢起隴畝之中三年遂將

五諸侯滅秦

集解駟案此時山東六國而齊趙韓魏燕五國並起從伐秦故云五諸侯

分裂

天下而封王侯政由羽出號為霸王位雖不終近古以

來未嘗有也及羽背闕懷楚

正義顏師古云背闕背約不王高祖於闕中懷楚謂

思東歸而都彭城

放逐義帝而自立怨王侯叛已難矣自矜功

伐奮其私智而不師古謂霸王之業欲以力征經營天

下五年卒亡其國


正義卒音子律反五年謂高帝元年至五年殺項羽東城

身死東

城尚不覺寤而不自責過矣乃引天亡我非用兵之罪

也豈不謬哉

索隱述贊曰亡秦鹿走偽楚狐鳴雲鬱沛父劍挺吳  
城勲開魯向勢合碣兵卿子無罪亞父推誠始救趙  
歎終誅子嬰連約王漢背闕懷楚帝遷上游臣迫故  
主靈壁大振成臯久拒戰非無功天實不興嗟彼蓋  
代卒為  
凶豎



史記卷七

史記卷七考證

項羽本紀索隱項羽不可稱本紀宜降為世家○

臣照

按史法天子則稱本紀者蓋祖述馬遷之文馬遷之前固無所為本紀也但馬遷之意並非以本紀為天子之服物采章若黃屋左纛然非天子不可用也特以天下之權之所在則其人係天下之本即謂之本紀若秦本紀言秦未得天下之先天下之勢已在秦也呂后本紀呂后固亦未若武氏之篡也而天下之

勢固在呂后則亦曰本紀也後世史官以君為本紀  
臣為列傳固亦無可議者但是宗馬遷之史法而小  
變之固不得轉據後以議前也索隱之說謬矣

項梁嘗有櫟陽逮捕○諸本皆無捕字惟北監本有之  
廣陵人召平○臣世駿按水經注廣陵城楚漢之間為

東陽郡高祖六年為荊國十一年為吳城景帝四年  
更名江都武帝元狩三年更曰廣陵此紀言廣陵者  
蓋史家追書之也



楚雖三戶亡秦必楚也集解瓚曰楚人怨秦雖三戶猶足以亡秦也索隱臣瓚與蘇林解同韋昭以為三戶楚三大姓昭屈景也二說皆非按左氏以畀楚師於三戶杜預注云今丹水縣北三戶亭則是地名不疑正義按服虔云三戶漳水津也孟康云津峽名也在鄴西三十里括地志云濁漳水又東經葛公亭北經三戶峽為三戶津在相州滏陽縣界然則南公辨陰陽識廢興之數知秦亡必于三戶故出此言後項羽

果渡三戶津破章邯軍降章邯秦遂亡是南公之善  
識○臣照按三戶只依瓚說為是作地名解迂矣曰  
雖曰必其義何居其後兵渡三戶亦偶合耳正義亦  
是曲為傅會

西破秦軍濮陽東正義括地志云濮陽縣在濮州西八  
十六里濮縣也古吳之國○古吳是昆吾二字之誤  
趙歇為王陳餘為將張耳為相皆走入鉅鹿城○或云  
此處餘耳皆走入城下云餘軍於外豈入而復出耶

張耳陳餘傳云張耳與趙王歇走入鉅鹿城王離圍之陳餘北收常山兵得數萬人軍鉅鹿北則餘固未嘗入城也蓋下文陳餘為將句與此處王相二句照應此處陳餘為將句當是刊落未盡耳臣照按趙王將相皆入鉅鹿城故章邯令王離涉間圍鉅鹿陳餘為將故北收常山兵數萬軍鉅鹿北圍固非頃刻可合也餘之得出而收兵固也叙王與將相固不得獨舍將不言而餘之軍鉅鹿北以為將故則又不得不

重叙也以為刊落未盡過矣

項羽召見諸侯將諸侯將入轅門○一本無下諸侯將三字

故立申陽為河南王都雒陽正義漢都洛陽改為雒漢以火德忌水故去洛旁水而加佳魏于行次為土土水之忌也水得土而流土得水而柔故除佳以加水○此魚豢典略語水經注及魏志注中亦引之火德作火行水之忌也作水之牡也

故立芮為衡山王都邾正義春秋時邾國曹姓狃居至  
魯隱公徙斬○春秋隱公世無邾徙斬事

故立都為齊王都臨菑正義括地志云青州臨菑縣地  
即古臨菑地也一名齊城古營邱之地所封齊之都  
也○文有舛誤據漢書地理志宜云青州臨菑縣地  
一名齊城即古營邱之地師尚父所封齊之都也

使劉賈將兵佐彭越燒楚積聚項王東擊破之走彭越  
漢王則引兵渡河復取成臯○歸有光曰漢高紀使

劉賈佐彭越燒楚積聚羽乃令曹咎守成皐而引兵  
定梁地漢破咎兵汜水上復取成皐是一事而此紀  
前後倒置遂作兩段若漢先取成皐楚無緣得令咎  
守之也考漢書紀傳自明

與漢俱臨廣武而軍正義戴延之側西征記云○側字  
衍

睢陽以北至穀城以與彭越正義括地志云穀城故在  
齊州東阿縣東二十六里○故下宜有城字

至坎下正義與老君相接○老君下宜有廟字

於是項王乃欲東渡烏江正義注水經云水又北左傳黃律口漢書所謂烏江亭長檣船以待項羽即此也○此條今本水經注無之

封呂勝為涅陽侯正義括地志云涅陽故地城在鄧州穰縣東北六十里○涅陽故地城地字衍文

及羽背關懷楚正義顏師古云背約不王高祖於關中懷楚謂思東歸而都彭城○顧炎武曰謂舍關中形

勝之地而都彭城若如師古之解乃背約非背闕也

史記卷七考證



欽定四庫全書

史部

史記卷八

詳校官侍讀學士臣陸伯焜

洗馬臣王坦修覆勘

覆校官中書臣陳林

校對官中書臣孫希旦

謄錄監生臣桑英

欽定四庫全書

史記卷八

漢 太史

令司馬遷撰

宋中郎外兵曹參軍裴駙集解

唐國子博士弘文館學士司馬貞索隱

唐諸王侍讀率府長史張守節正義

高祖本紀第八

高祖

集解駙案漢書音義曰諱邦張晏曰禮諡法無高以為功最高而為漢帝之太祖故特起名焉

沛

豐邑中陽里人姓劉氏

集解李斐曰沛小沛也劉氏隨魏徙大梁移在豐居中陽里孟

康曰後沛為郡豐為縣索隱按高祖劉累之後別食邑於范士會之裔留秦不反更為劉氏劉氏隨魏徙大梁後居豐今言姓劉氏者是左傳天子建德因生以賜姓昨之土命之氏諸侯以字為諡因以為族說者以為天子賜姓命氏諸侯命族者氏之別名也然則因生賜姓若舜生姚墟以為姚姓封之於虞即號有虞氏是也此云姓劉氏亦其義也故姓者所以統繫百代使不別也氏者所以別子孫之所出又系本篇言姓則在上言氏則在下故五帝本紀云禹姓姒氏契姓子氏棄姓姬氏是也按漢改泗水為沛郡字季索隱按漢書名邦字治相城故注以沛為小沛也

字季

索隱按漢書名邦字疑按漢高祖長兄名伯次名仲不見別名則季亦是名也故項岱云高祖小字季即位易名邦後因諱邦不諱

季所以季父曰太公索隱皇甫謐云名執嘉王符云太

布猶稱姓成圖云劉媪夢赤鳥母曰劉媪集解文穎曰幽州及漢

如龍戲已生執嘉曰長老尊稱也左師謂太后曰媪愛燕后賢長安君禮

樂志地神曰媪媪母別名也音烏老反索隱韋昭云媪

婦人長老之稱皇甫謐云媪蓋姓王氏又據春秋握成

圖以為執嘉妻含始遊洛池生劉季詩含神霧亦云姓

字皆非正史所出蓋無可取今近有人云母溫氏貞時

打得班固泗水亭長古碑文其字分明作溫字云母溫

氏貞與賈膺復徐彥伯魏奉古等執對反覆沉漢古人

未聞聊記異見於何取實也孟康注地神曰媪者禮樂

志云后土富媪張晏云坤為母故稱媪也正義帝王世

紀云漢昭靈后含始游洛池有寶雞銜赤珠出炫日

吞之生高祖詩含神霧亦云含始即昭靈后也陳留風

俗傳云沛公起兵野戰喪皇妣於黃鄉天下平定使使

者以梓宮招幽魂於是丹蛇在水自洒躍入梓宮其浴處有遺髮謚曰昭靈夫人漢儀注云高帝母起兵時死小黃城後於小黃立陵廟括地志云小黃故城在汴州陳留縣東北三十三里顏師古云皇甫謐等妄引讖記好奇騁博強為高祖父母名字皆非正史所說蓋無取焉寧有劉媪本姓實存史遷肯不詳載即理而言斷可矣知其先劉媪嘗息大澤之陂夢與神遇是時雷電晦冥

太公往視則見蛟龍於其上

索隱按詩含神霧云赤龍感女媧劉季興又廣雅云

有鱗曰蛟龍

已而有身遂產高祖高祖為人隆準而龍顏

集解

服虔曰準音拙應劭曰隆高也準頰權準也顏頰頰也齊人謂之頰汝南淮泗之間曰頰文頰曰準鼻也索隱始皇蜂目長準蓋鼻高起文頰說是高祖感龍而生故其顏貌似龍長頸而高鼻

美須髯左股

有七十二黑子

正義河圖云帝劉季日角戴勝斗胃龜背龍股長七尺八寸握成圖云赤帝體

為朱鳥其表龍顏多黑子按左陽也七十二黑子者赤帝七十二日之數也木火土金水各居一方一歲三百

六十日四方分之各得九十日土居中央並索四季各十八日俱成七十二日故高祖七十二黑子者應火德

七十二日之徵也有一本七十日者非也許北人呼為鬻子吳楚謂之誌誌記也 仁而愛人喜

施

正義喜許記反施尸歧反

意豁如也

集解服虔曰豁達也

常有大度不事家

人生產作業及壯試為吏

集解應劭曰試補吏

為泗水亭長

正義秦法

十里一亭十亭一鄉亭長主亭之吏高祖為泗水亭長也國語有寓室即今之亭也亭長蓋今里長也民有訟評吏留平辨得成其政括地志云泗水亭在徐州沛縣東一百步有高祖廟也 廷中吏無所不

狎侮好酒及色常從王媪武負貫酒

集解韋昭曰貫賒也索隱鄒誕生貫

音世與字林聲韻並同又音時夜反廣雅云貫賒也說文云貫貸也臨淮有貫陽縣漢書功臣表貫陽侯劉纏

而此紀作射陽則貫亦射也醉臥武負王媪見其上常有龍怪之高

祖每酤留飲酒讎數倍

集解如淳曰讎亦售索隱樂彥云借讎為售蓋古字少假借耳

今亦依字讀蓋高祖大度既貫飲且讎其數倍價也及見怪歲竟此兩家常折券

棄責

索隱周禮小司寇聽稱責以傅別鄭司農云傅別券書也鄭元云傅別謂大手書於札中而別之也

然則古用簡札書故可折至歲終總棄不責也

高祖常繇咸陽

集解應劭曰繇役也索隱韋昭

云秦所都武帝更名渭城應劭云今長安也按關中記云孝公都咸陽今渭城是在渭北始皇都咸陽今城南

大城是也名咸陽者山南曰陽水北亦曰陽其縱觀觀地在渭水之北又在九峻諸山之南故曰咸陽

秦皇帝

正義包愷云上音館下音官恣意故縱觀也

喟然太息曰嗟乎大丈夫

夫當如此也單父人呂公

集解駟案漢書音義曰單音善父音芥索隱韋昭云單父

縣名屬山陽崔浩云史失其名但舉姓而言公又按漢舊儀云呂公汝南新蔡人又相經云魏人呂公名文字

叔平也善沛令避仇從之客因家沛焉沛中豪傑吏聞令

有重客皆往賀蕭何為主吏

集解孟康曰主吏功曹也

主進

集解文穎曰主

賦斂禮進為之帥索隱鄭氏云主賦斂禮錢也顏師古曰進者會禮之財字本作賈聲轉為進宣帝數負進義

與此

令諸大夫曰

正義曰大夫客之貴者總稱之

進不滿千錢坐之堂



下高祖為亭長素易諸吏乃給為謁曰賀錢萬實不持

一錢

集解應劭曰給欺也音殆索隱韋昭云給詐也劉氏云給欺負也何休云給疑也謂高祖素狎易諸

吏乃詐為謁謁謂以札書姓名謁入呂公大驚起迎之

若今之通刺而兼載錢穀也

門呂公者好相人見高祖狀貌因重敬之引入坐蕭何曰劉季固多大言少成事高祖因狎侮諸客遂坐上坐

正義上在果反下在臥反無所詘正義音丘忽反酒闌集解文穎曰闌言希也謂飲酒者半罷半

在謂之闌呂公因目固留高祖正義不敢對衆顯言故目動而留之高祖竟酒

後呂公曰臣少好相人集解張晏曰古人相與語多自稱臣自卑下之道若今人相與

語皆自稱僕相人多矣無如季相願季自愛臣有息女正義息生

也謂所生之女也願為季箕帚妾酒罷呂媪怒呂公曰公始常

欲奇此女與貴人沛令善公求之不與何自妄許與劉

季呂公曰此非兒女子所知也卒與劉季呂公女乃呂

后也生孝惠曾元公主集解服虔曰元諡也正義漢帝制女

曰公主儀比諸侯姊妹曰長公主儀比諸侯王高祖為亭長時

常告歸之田集解服虔曰告音如嗥呼之嗥李斐曰休

吏休假曰告告又音響漢律吏二千石有予告賜告予告者在官有功最法所當得者也賜告者病滿三月當

免天子優賜復其告使得帶印綬將官屬歸家治疾也  
索隱韋昭云告請歸乞假也音告語之告戰國策曰商  
君告歸延篤以為告歸今之歸寧也劉伯莊顏師古並  
音古篤反服音如嗶呼之嗶按東觀漢記田邑傳云邑  
年三十歷卿大夫號歸罷厭事少所嗜欲尋號與嗶同  
古者當有此語今服虔雖據田邑號歸亦恐未為得然  
此告字當音誥誥號聲相近故後告歸號歸遂變也

呂后與兩子居田中耨有一

老父過請飲呂后因舖之

正義必捕反以食飼人也父本請飲呂后因飼之國語云

國中童子無不舖

老父相呂后曰夫人天下貴人令相兩子見

孝惠曰夫人所以貴者乃此男也相魯元亦皆貴老父  
已去高祖適從旁舍來呂后具言客有過相我子母皆

大貴高祖問曰未遠乃追及問老父老父曰鄉者夫人

嬰兒皆似君君相貴不可言高祖乃謝曰誠如父言不

敢忘德及高祖貴遂不知老父處高祖為亭長乃以竹

皮為冠令求盜之薛治之

集解應劭曰以竹始生皮作冠今鵲尾冠是也求盜者舊

時亭有兩卒其一為亭父掌開閉掃除一為求盜掌逐捕盜賊薛魯國縣也有作冠師故往治之索隱應劭曰

一名長冠側竹皮裹以縱前高七寸廣三寸如板又蔡邕獨斷云長冠楚製也高祖以竹皮為之謂之劉氏冠

司馬彪輿服志亦以劉氏冠為鵲尾冠應劭云舊亭卒名弩父陳楚謂之亭父或云亭部淮泗謂之求盜也

時時冠之

正義音館

及貴常冠所謂劉氏冠

正義音官顏師古云後號為劉

氏冠其後詔曰爵非公乘乃是以高祖以亭長為縣送

徒酈山徒多道亡自度比至皆亡之

正義度田洛反比必寐反

至豐

西澤中止飲夜乃解縱所送徒曰公等皆去吾亦從此

逝矣徒中壯士願從者十餘人高祖被酒

正義被加也

夜徑

澤中

索隱舊音經按廣雅云徑小道音古定反言酒後放徒夜徑行澤中不敢由正路且從小徑

令

一人行前

正義行音下孟反

行前者還報曰前有大蛇當徑

索隱

鄭玄云步道曰徑

願還高祖醉曰壯士行何畏乃前拔劍擊斬

蛇

索隱漢舊儀云斬蛇劍長七尺又高祖云吾以布衣提三尺劍取天下二文不同者崔豹古今注當高祖

為亭長理應提三尺劍耳及貴當別得七尺寶劍故儀  
因言之正義按其蛇大理須別求是劍斬之三尺劍者

常佩之劍括地志云斬蛇溝源出徐州豐縣中平蛇  
地故老云高祖斬蛇處至縣西十五里入泡水也蛇遂

分為兩索隱謂斬蛇分為兩段徑開行數里醉因臥後人來至蛇

所有一老嫗夜哭人問何哭嫗曰人殺吾子故哭之人

曰嫗子何為見殺嫗曰吾子白帝子也化為蛇當道今

為赤帝子斬之集解應劭曰秦襄公自以居西戎主少昊之神作西時祠白帝至獻公時櫟陽

雨金以為瑞又作畦時祠白帝少昊金德也赤帝堯後謂漢也殺之者明漢當滅秦也秦自謂水漢初自謂土

皆失之至光武乃改定索隱按太康地理志云時在櫟陽故城內其時若畦故曰畦時畦音戶圭反應註云秦

自謂水者按秦文公獲黑龍命河為德水是也又按春秋合誠圖云水神哭子寢敗宋均以為高祖斬白蛇而神母哭則此母水精也此皆謬說又註云至光武乃改者謂改漢為火德秦為金德與雨金及赤帝子之理合也故哭人乃以嫗為不誠欲答之

集解徐廣曰一作苦索隱說文云答擊也

漢書作苦謂欲困辱之

嫗因忽不見後人至高祖覺

索隱包愷伯莊音古孝反

後人告高祖高祖乃心獨喜自負

集解應劭曰負恃也索隱晉灼云自恃斬

蛇諸從者日益畏之秦始皇帝常曰東南有天子氣於

是因東游以厭之

索隱厭音一涉反又一再反廣雅云厭鎮也

高祖即自疑

亡匿隱於芒碭山澤巖石之間

集解徐廣曰芒今臨淮縣也碭縣在梁駟按應

劭曰二縣之界有山澤之固故隱於其間也正義括地志云宋州碭山縣在州東一百五十里本漢碭陽縣也

碭山在縣東

呂后與人俱求常得之高祖怪問之呂后曰季

所居上常有雲氣

正義顏師古曰京房易兆候云何以知賢人隱四方常有大雲五色具而

不雨其下有賢人隱矣故呂后望雲氣而得之

故從往常得季高祖心喜沛中

子弟或聞之多欲附者矣秦二世元年

集解徐廣曰高祖時年四十八

索隱應劭云始皇欲以一至萬示不相襲始者一故至子稱二世崔浩云二世始皇子胡亥又按善文稱隱士

云趙高為二世殺十七兄而立為王則二世是第十八子也

秋陳勝等起蕪至陳而

王號為張楚

索隱蕪縣名屬沛音機又音祈

諸郡縣皆多殺其長吏以



應陳涉沛令恐欲以沛應涉掾主吏蕭何曹參

索隱按漢書蕭

曹參參為獄掾何為主吏

乃曰君為秦吏今欲背之率沛子弟恐不

聽願君召諸亡在外者可得數百人因劫衆

索隱說丈云以力脅

之衆不敢不聽乃令樊噲召劉季劉季之衆已數十百

人矣

索隱漢書作數百人劉伯莊云數十人或至百人則是百人已下也

於是樊噲從劉

季來沛令後悔恐其有變乃閉城城守欲誅蕭曹蕭曹

恐踰城保劉季

集解韋昭曰以為保鄣

劉季乃書帛射城上謂沛

父老曰天下苦秦久矣今父老雖為沛令守諸侯並起

今屠沛

索隱范曄謂剋城多所誅殺故云屠

沛今共誅令擇子弟可立者

立之以應諸侯則家室完不然父子俱屠無為也父老

乃率子弟共殺沛令開城門迎劉季欲以為沛令劉季

曰天下方擾諸侯並起今置將不善壹敗塗地

索隱言一朝破

敗使肝腦塗地

吾非敢自愛恐能薄

正義能才能也高祖謙言才能薄劣不能完全其衆

能者獸形色似熊足似鹿為物堅中而強力人之有賢才者皆謂之能也

不能完父兄弟

此大事願更相推擇可者蕭曹等皆文吏自愛恐事不

就後秦種族其家盡讓劉季諸父老皆曰平生所聞劉

季諸珍怪當貴且卜筮之莫如劉季最吉於是劉季數

讓衆莫敢為乃立季為沛公

集解徐廣曰九月也駟按漢書音義曰舊楚僭稱王

其縣宰為公陳涉為楚王沛公起應涉故從楚制稱曰公

祠黃帝祭蚩尤於沛庭

集解

應劭曰左傳曰黃帝戰於阪泉以定天下蚩尤好五兵故祠祭之求福祥也瓚曰管仲云葛盧山交而出水金

從之出蚩尤受之以作劍戟索隱按管子云葛盧之山發而出金今注引發作交誤也

而釁鼓

集解

應劭曰釁祭也殺牲以血塗鼓曰釁瓚曰按禮記及大戴禮有釁廟之禮皆無祭事索隱說文云釁血祭也司

馬法曰血于擊鼓者神戎器也顏師古曰殺牲以血祭者皆名為釁臣瓚以為皆無祭事非也又古人新成鍾

鼎亦必釁之應劭曰釁呼為豐馬融註周禮灼龜之兆云謂其象似玉瓦原之釁瘳是用名之此說皆非瘳音

火稼

反 旗幟皆赤

索隱墨翟云幟帛長丈五廣半幅字詁云幟標也字林又云熊旗五旂謂與士

卒為期於其下故曰旗也幟或作識或作志嵇康音試蕭該音幟

由所殺蛇白帝子殺

者赤帝子故上赤於是少年豪吏如蕭曹樊噲等皆為

收沛子弟二三千人攻胡陵方與

集解鄭德曰音房豫屬山陽郡索隱鄧展

曰胡陵縣名屬山陽章帝改曰胡陸

還守豐秦二世二年陳涉之將周章

軍西至戲而還

索隱應劭云章字文陳人文穎云戲在新豐東二十里戲亭北孟康云水名也

又述征記云戲水自驪山馮公谷北流歷戲亭東入渭按今其水東惟有戲驛存還謂為章邯所破而還邯音

酣 燕趙齊魏皆自立為王

索隱按漢書高紀二世二年八月武臣自立為趙王田儼

自立為齊王韓廣自立為魏王

項氏起吳秦泗川監平

集解文穎

曰泗川今沛郡也高祖更名沛秦時御史監郡若今刺

史平名也索隱如淳云秦并天下為三十六郡置守尉

監故此有監平下有將兵圍豐二日出與戰破之命雍

守壯則平壯皆名也

茵守豐引兵之薛泗川守壯敗於薛走至戚

集解如淳曰壯名也戚音將毒反索隱晉灼云東海縣也鄭德包愷並如字

讀李登音千笠反正義括地志云沂州臨沂縣有漢戚

縣故城地理志云臨沂縣屬東海郡

沛公左司馬得泗川守壯殺之

索隱古云得司馬之名非也按後云左司馬曹無傷自此已下更不見替易處蓋是左司馬無傷得泗川守壯而殺

之沛公還軍亢父

集解鄭德曰亢音人相亢答父音甫屬任城郡索隱舊音剛劉伯莊包愷

並音苦浪反正義音剛又苦浪反括  
地志云亢父縣也沛公屯軍於此

至方與周市來攻

方與未戰陳王使魏人周市畧地周市使人謂雍齒曰

豐故梁徙也

集解文穎曰梁惠王孫假為秦  
所滅轉東徙於豐故曰豐梁徙

今魏地已

定者數十城齒今下魏魏以齒為侯守豐不下且屠豐

雍齒雅不欲屬沛公

集解服虔曰雅故  
也蘇林曰雅素也

及魏招之即反

為魏守豐沛公引兵攻豐不能取沛公病還之沛沛公

怨雍齒與豐子弟叛之聞東陽甯君秦嘉

集解文穎曰  
秦嘉東陽郡

人也為甯縣君瓚曰陳勝傳曰廣陵人秦嘉然則嘉非  
東陽人也秦嘉初起兵於郟號曰大司馬又不為甯縣

君東陽甯君自一人秦嘉又自一人索隱按下文直云東陽甯君又別言秦嘉則臣攢之說為得顏師古以甯

是姓君者立景駒為假王在留索隱章昭云今彭城留時人號之縣也正義括地志云留

城在徐州沛縣東南五十里即張良所封處乃往從之欲請兵以攻豐是時

秦將章邯從陳別將司馬尼集解如淳曰從陳涉將也涉在陳其將相別在他許

皆稱陳尼章邯司馬索隱謂章邯從陳別將將兵向他處而遣司馬尼將領兵士北定楚地孔文祥曰邯別遣

尼屠相又一說云從謂追逐之言章邯討逐陳別將而司馬尼別將兵北定楚地此理亦通也將兵北

定楚地屠相至碭索隱韋昭云相沛縣應劭云碭梁國蘇林音唐又音宕正義括地志云故

相城在徐州符離縣西北九十里東陽甯君沛公引兵西里碭在宋州東一百五十里

與戰蕭西

索隱韋昭云蕭沛之縣名謂在蕭縣之西

不利還收兵聚留引兵

攻碭三日乃取碭因收碭兵得五六千人攻下邑拔之

索隱范曄云得城為拔韋昭云下邑縣名屬梁國也

還軍豐聞項梁在薛

正義今徐州滕

縣故薛城也

從騎百餘往見之

集解徐廣曰三月

項梁益沛公卒五

千人五大夫將十人

集解蘇林曰五大夫第九爵也以五大夫為將凡十人也

沛公

還引兵攻豐

集解徐廣曰表云拔之雍齒奔魏

從項梁月餘項羽已拔

襄城

索隱韋昭云潁川縣正義襄城許州縣

還項梁盡召別將居薛聞陳

王定死因立楚後懷王孫心為楚王治盱台

索隱韋昭云臨淮縣



音吁夷正義楚縣也項梁號武信君居數月北攻亢父救東阿隱

章昭云東郡之縣名正義濟州縣也破秦軍齊軍歸楚獨追北集解服虔曰師敗曰

北使沛公項羽別攻城陽屠之索隱地理志城陽屬濟陰軍濮陽之

東正義濮陽故城在濮州西與秦軍戰破之秦軍復振

集解李奇曰振整也如淳曰振起也收敗卒自振迅而復起也守濮陽環水集解文穎曰決水以

自環守為固也張晏曰依河水以自環繞作壘正義按二說皆通其濮陽縣北臨黃河言秦軍北阻黃河南鑿

溝引黃河水環繞作壁壘為固楚軍乃去楚軍去而攻定陶索隱地理志云濟陰縣定

陶未下沛公與項羽西畧地至雍丘之下索隱韋昭云故杞國今陳

留縣

與秦軍戰大破之斬李由還攻外黃

索隱韋昭云工陳留縣正義在

雍丘東

外黃未下項梁再破秦軍有驕色宋義諫不聽索隱

荀悅漢紀云故楚令尹宋義當別有所出

秦益章邯兵夜銜枚擊項梁

集解駟案

周禮有銜枚氏鄭玄曰銜枚止言語謹也枚狀如著橫銜之縲結於項者縲音獲

大破之定陶

項梁死沛公與項羽方攻陳留聞項梁死引兵與呂將

軍俱東呂臣軍彭城東項羽軍彭城西沛公軍碭章邯

已破項梁軍則以為楚地兵不足憂乃渡河北擊趙大

破之當是之時趙歇為王

索隱歇蘇林音如字鄭德音過絕之過徐廣音烏轄反今

依字 讀 秦將王離圍之鉅鹿城此所謂河北之軍也秦二

世三年楚懷王見項梁軍破恐徙盱台都彭城并呂臣

項羽軍自將之以沛公為碭郡長

正義括地志云宋州本秦碭郡蘇林云長

如郡守韋昭云秦名曰守是時改曰長

封為武安侯將碭郡兵封項羽為

長安侯號為魯公呂臣為司徒其父呂青為令尹

索隱按表

青封信陽侯正義應劭云天子曰師尹諸侯曰令尹時去六國近故置令尹臣瓚曰諸侯之卿唯楚稱令尹其

餘國不稱時立楚之後故置官司皆如楚舊也 趙數請救懷王乃以宋義為上

將軍項羽為次將范增為末將北救趙令沛公西畧地

入關與諸將約先入定關中者王之

索隱韋昭云函谷武關也又三輔舊

事云西以散關為限東以函谷為界二關之中謂之關中

當是時秦兵彊常乘勝逐

北諸將莫利先入關獨項羽怨秦破項梁軍奮

索隱韋昭云憤

也激願與沛公西入關懷王諸老將皆曰項羽為人僂悍

猶賊

索隱說文云僂疾也悍勇也一云僂輕也音匹妙反漢書作禍賊也

項羽嘗攻襄城

襄城無遺類皆阬之

集解徐廣曰遺一作噍噍食也音在妙反駟按如淳曰類無復有活

而噍食者也青州俗言無子遺為無噍類

諸所過無不殘滅且楚數進取

集

如淳曰楚謂陳涉也

前陳王

集解駟按漢書音義曰陳涉也

項梁皆敗

不如更遣長者扶義而西

正義遣長者扶持仁義而西告諭秦長少令降下也

告

諭秦父兄秦父兄苦其主久矣今誠得長者往毋侵暴

宜可下今項羽僥倖今

集解徐廣曰無此字

不可遣獨沛公素寬

大長者可遣卒不許項羽而遣沛公西畧地收陳王項

梁散卒乃道碭至成陽與杠里

集解駟案漢書音義曰道由碭也成陽杠里二

縣名索隱成陽縣名在濟陰韋昭云在潁州非也服虔云杠里縣名如淳云秦軍所屯地名

秦軍夾

壁破魏二軍楚軍出兵擊王離大破之

集解徐廣曰表云三年十月攻

破東郡尉及王離軍於成武南

沛公引兵西遇彭越昌邑

正義地理志云昌邑屬山

陽括地志云在曹州成武縣東北三十二里有梁邱故城是也

因與俱攻秦軍戰不利

還至粟

索隱章昭云縣名屬沛也

遇剛武侯

集解應劭曰楚懷王將也駟案漢書音義曰功

臣表云棘蒲剛侯陳武武一姓柴剛武侯宜為剛侯武魏將也攢曰功臣表柴武以將軍起薛別救東阿至霸

上入漢中非懷王將也又非魏將也例未有稱謚正義顏師古云史失其名姓唯識其爵號不知誰也不當改

為剛侯武應氏以為懷王將又云魏將無據矣表六年三月封孟顏二人說是奪其軍可四千

餘人并之與魏將皇欣魏申徒武蒲之軍

正義並魏將也欣字或作

訖音許斤反蒲漢書作滿並通也

并攻昌邑昌邑未拔西過高陽

集解文穎

曰聚邑名也屬陳留圉縣攢曰陳留傳曰在雍丘西南

酈食其

集解鄭德曰音歷異基

謂監

門曰諸將過此者多吾視沛公大人長者乃求見說沛

公沛公方踞牀使兩女子洗足酈生不拜長揖曰足下

必欲誅無道秦不宜踞見長者於是沛公起攝衣謝之

延上坐食其說沛公襲陳留

集解駟案漢書音義曰春秋傳曰輕行無鍾鼓曰襲

得秦積粟乃以酈食其為廣野君

索隱韋昭云在山陽酈商為將

將陳留兵與偕攻開封

索隱韋昭云河南縣

開封未拔西與秦將

楊熊戰白馬

索隱韋昭云東郡縣正義括地志云白馬故城在滑州衛南縣西南二十四里戴延

之西征記云白馬故城衛之漕邑

又戰曲遇東大破之

索隱徐廣云曲遇在中牟韋昭

云志不載司馬彪郡國志中牟有曲遇聚也

楊熊走之滎陽

索隱韋昭云故衛地河南縣也

二世使使者斬以徇

集解徐廣曰四月

南攻潁陽屠之因張良

遂略韓地轅轅

集解文穎曰河南新鄭南至潁川北皆韓地也以良累世相韓故因之瓚曰

轅轅險道名在緱氏東南索隱按十三州志云河南緱氏縣以山為名一云轅轅為九十二曲是險道也當

是時別將司馬卬方欲渡河入關沛公乃北攻平陰

集解

駟案地理志河南有平陰縣今河陰是也絕河津南戰雒陽東軍不利還至

陽城

正義今洛州夏禹所都

收軍中馬騎與南陽守齧戰犍東

集解

駟案地理志南陽有犍縣索隱齧音蟻許慎以為側齧也破之略南陽郡南陽守齧



走保城守宛

正義守音狩宛於元反括地志云南陽縣故城在宛大城之南隅其西南有二面皆

故宛城

沛公引兵過而西張良諫曰沛公雖欲急入關秦

兵尚衆距險今不下宛宛從後擊彊秦在前此危道也

於是沛公乃夜引兵從他道還更旗幟黎明圍宛城三

匝

索隱黎音犁黎猶比也謂比至天明也漢書作遲音值值待也謂待天明時皆言早意也楚漢春秋曰上

南攻宛匿旌旗人銜枚馬束舌難未鳴已圍宛城三匝

南陽守欲自剄其舍人陳

恢曰死未晚也乃踰城見沛公曰臣聞足下約先入咸

陽者王之今足下留守宛宛大郡之都也連城數十人

民衆積蓄多吏人自以為降必死故皆堅守乘城

索隱李奇

曰乘守也韋昭曰乘登也

今足下盡日止攻士死傷者必多引兵去

宛宛必隨足下後足下前則失咸陽之約後又有彊宛之患為足下計莫若約降封其守因使止守引其甲卒

與之西諸城未下者聞聲爭開門而待足下通行無所

累沛公曰善

集解徐廣曰七月也

乃以宛守為殷侯

索隱

韋昭曰在河內

封

陳恢千戶引兵西無不下者至丹水

正義括地志云故丹城在鄧州內鄉

縣西南百三十里南去丹水二百步汝冢紀年云后稷放帝子丹朱于丹水是也輿地志云秦為丹水縣也地

理志云丹水縣屬弘農郡抱朴子云丹水出丹魚先夏至十日夜伺之魚浮水側光照如火網而取之割其血

以塗足可以步行水上長居川中不溺

高武侯鯤

集解蘇林曰鯤音魚鯤之鯤晉灼曰功臣表咸

也 鯤 襄侯王陵降西陵

集解韋昭曰漢封王陵為安國侯初起兵時在南陽南陽有穰縣疑

襄當為穰而無禾字省耳今邵公或作召字此類多矣瓚曰時韓成封穰侯江夏有襄是所封索隱按王陵封

安國侯是定天下為丞相時封耳此言還攻胡陽集解襄侯當如臣瓚解蓋初封江夏之襄也一云

陵索隱韋昭云南陽縣

過番君別將梅銷與皆降析酈

集解如淳曰持益反

索隱鄒誕生音錫歷蘇林如淳音擲析屬弘農酈屬南陽出地理志而左傳云析一名白羽析今內鄉縣酈今

縣也 遣魏人甯昌使秦使者未來是時章邯已以軍降

項羽於趙矣初項羽與宋義北救趙及項羽殺宋義代  
為上將軍諸將黥布皆屬破秦將王離軍降章邯諸侯  
皆附及趙高已殺二世使人來欲約分王關中沛公以

為詐乃用張良計使酈生陸賈往說秦將啗以利因襲

攻武關破之

索隱左傳云楚司馬起營所以臨上雒謂  
晉人曰將通於少習杜預以為商縣武關

又太康地理志武關當冠  
軍縣西峽關在武關之西

又與秦軍戰於藍田南益張

疑兵旗幟諸所過毋得掠鹵

集解應劭曰  
鹵與虜同

秦人憚秦軍

解因大破之又戰其北大破之乘勝遂破之

漢元年十月

集解如淳曰張蒼傳云以高祖十月至霸上故因秦以十月為歲首正義沛公已未

年七月至霸上項羽封十八諸侯沛公封漢王後劉項五年戰鬪漢遂滅楚天下歸漢故却書初至霸上戰之

月沛公兵遂先諸侯至霸上

正義故霸陵在雍州萬年縣東北二十五里漢霸陵

文帝之陵邑也東南去霸陵十里地理志云霸陵故芷陽文帝更名三秦記云霸城秦穆公築為宮因名霸城

漢於北置霸陵廟記云霸城漢文帝築沛公入關遂至霸上即此也

秦王子嬰素車白馬

係頸以組封皇帝璽符節

索隱韋昭云天子印稱璽又獨以玉符發兵將也節使者

所擁也說文云符信也漢制以竹長六寸分而相合釋名云節為號令賞罰之節也又節毛上下相重取象竹

節又漢官儀曰子嬰上始皇璽因服御之代代傳受號又漢傳國璽正義按天子有六璽皇帝行璽皇帝之璽

皇帝信璽天子行璽天子之璽天子信璽皇帝信璽凡事皆用之璽令施行天子信璽以遷拜封王侯之璽以

發兵皆以武都紫泥封青布索白素兩端無縫三秦記云紫泥水在今成州輿地志云漢封詔璽用紫泥則此

水之泥也降軹道旁索隱軹音只漢書宮殿疏云枳道亭東去霸城觀四里觀東去霸水百步蘇林

云在長安東十三里正義軹音紙括地志云軹道在雍州萬年縣東北十六里苑中諸將或言誅

秦王索隱楚漢春秋曰樊噲請殺之沛公曰始懷王遣我固以能寬容

且人已服降又殺之不祥乃以秦王屬吏正義屬之欲反屬付也

遂西入咸陽欲止宮休舍正義休息也言欲居止宮殿中而息也樊噲張

良諫乃封秦重寶財物府庫還軍霸上召諸縣父老豪

傑曰父老苦秦苛法久矣誹謗者族

索隱劉伯莊樂彥同音方未反偶

語者棄市

集解應劭曰秦禁民聚語偶對也瓚曰始皇本紀曰偶語經書者棄市索隱按禮云刑人

於市與衆棄之故今律謂絞刑為棄也

吾與諸侯約先入關者王之吾當

王關中與父老約法三章耳殺人者死傷人及盜抵罪

集解應劭曰抵至也又當也除秦酷政但至於罪也李斐曰傷人有曲直盜賊有多少罪名不可預定故凡言

抵罪未知抵何罪也張晏曰秦法一人犯罪舉家及隣伍坐之今但當其身坐合於康誥父子兄弟罪不相及

也索隱韋昭云抵當也謂使各當其罪今按秦法有三族之刑漢但約法三章耳殺人者死傷人及盜者使之

抵罪餘並不論其辜以言省刑也則抵訓餘悉除去秦為至殺人以外唯傷人及盜使至罪名耳

法諸吏人皆案堵如故

集解應劭曰案次第堵牆堵也

凡吾所以來為

父老除害非有所侵暴無恐且吾所以還軍霸上待諸  
侯至而定約束耳乃使人與秦吏行縣鄉邑告諭之秦  
人大喜爭持牛羊酒食獻饗軍士沛公又讓不受曰倉  
粟多非乏不欲費人人又益喜唯恐沛公不為秦王或

說沛公

索隱楚漢春秋云解先生云遣守函谷無內項王而張良世家云鯁生說我言鯁小也小生即

解生曰秦富十倍天下地形疆今聞章邯降項羽項羽乃

號為雍王王關中今則來沛公恐不得有此可急使兵



守函谷關

正義顏師古曰今桃林南有洪溜澗古函谷也其水北流入河西岸猶有舊關餘跡西征

記云道形如函也其水山原壁立數十仞谷中容一車

無內諸侯軍稍徵關中兵

以自益距之沛公然其計從之十一月中項羽果率諸

侯兵西欲入關關門閉聞沛公已定關中大怒使黥布

等攻破函谷關十二月中遂至戲

正義許宜反

沛公左司馬

曹無傷聞項王怒欲攻沛公使人言項羽曰沛公欲王

關中令子嬰為相珍寶盡有之欲以求封

正義曹無傷欲就項羽求

封亞父勸項羽擊沛公

索隱范增也項羽得范增號曰亞父言尊之亞於父猶管仲齊

謂仲父父  
並音甫

方饗士旦日合戰是時項羽兵四十萬號百

萬沛公兵十萬號二十萬力不敵會項伯欲活張良夜

往見良因以文諭項羽

正義項羽本紀云項伯曰沛公  
不先破關中公豈敢入乎今人

有大功擊之不  
義此以文諭之

項羽乃止沛公從百餘騎驅之鴻門隱

姚察云在新豐古城東未至戲  
水道南有斷原南北洞門是也

見謝項羽項羽曰此沛

公左司馬曹無傷言之不然籍何以至此沛公以樊噲

張良故得解歸歸立誅曹無傷項羽遂西屠燒咸陽秦

宮室所過無不殘破秦人大失望然恐不敢不服耳項

羽使人還報懷王懷王曰如約項羽怨懷王不肯令與

沛公俱西入關而北救趙後天下約

正義懷王初約先入咸陽者王之令

羽北救趙故失約在後也

乃曰懷王者吾家項梁所立耳非有功伐

何以得主約本定天下諸將及籍也乃佯尊懷王為義

帝實不用其命正月

正義崔浩云史官以正月紀四時故書正月也荀悅云先春後正月

也顏師古云凡此諸月號皆大初正歷之後記事者追改之非當時本稱也以十月為歲首即以十月為正月

今此正月當是謂之四月也他皆放此

項羽自立為西楚霸王梁楚地

九郡都彭城負約更立沛公為漢王

正義梁州本漢中郡以漢水為名

王巴蜀漢中

集解徐廣曰三十二縣

都南鄭三分關中立秦三將

章邯為雍王

正義以岐州雍縣為名

都廢丘司馬欣為塞王

正義塞先

代反章昭云在長安東名桃林塞按桃林塞今華州潼關也顏師古云取河華之固為扼塞耳非桃林

都

櫟陽

索隱因葬太上皇改名曰萬年

董翳為翟王

正義文穎云本上郡秦所置項羽以董翳

為王更名曰翟也

都高奴楚將瑕丘申陽為河南王

正義在黃河之南故

曰河南即今河南府

都洛陽趙將司馬卬為殷王

正義以商帝盤庚國殷中之地

改商為殷在相州安陽縣即北冢殷墟南去朝歌百三十六里故號殷王都朝歌

都朝歌趙王

歇徙王代趙相張耳為常山王都襄國當陽君黥布為

九江王都六

索隱韋昭云當陽南郡縣名地理志六縣屬六安國

懷王柱國共敖

為臨江王

正義孟康云本南郡改為臨江國是也

都江陵番君吳芮為衡

山王都邾

索隱太康地理志云楚滅邾遷其人於江南因名縣

燕將臧荼為燕王

都薊故燕王韓廣徙王遼東廣不聽臧荼攻殺之無終

封成安君陳餘河間三縣居南皮封梅鋗十萬戶四月

兵罷戲下

正義戲音麾許慎注淮南子云戲大旗也

諸侯各就國漢王之國

項王使卒三萬人從楚與諸侯之慕從者數萬人從杜

南

正義韋昭云今陵邑括地志云杜陵故城在雍州萬年縣東南十五里漢杜陵縣宣帝陵邑也北去宣帝陵

五里廟記云  
故杜伯國

入蝕中

集解李奇曰蝕音力在杜南如淳曰蝕入漢中道川谷名索隱孟康

音食王劭按說文作鍾器名也地形似器故名之

去輒燒絕棧道

索隱按系家是用張良計

也棧道閣道也音士諫反包愷音士版反崔浩云險絕之處傍鑿山巖而施版梁為閣

以備諸侯

盜兵襲之亦示項羽無東意至南鄭諸將及士卒多道

亡歸士卒皆歌思東歸韓信說漢王曰

集解徐廣曰韓王信非淮陰侯

也項羽王諸將之有功者而王獨居南鄭是遷也

集解韋昭

曰若有罪見遷徙

軍吏士卒皆山東之人也日夜跂而望歸

正義

跂音丘助反說文云跂舉踵也司馬彪云跂望也

及其鋒而用之可以有大功

天下已定人皆自寧不可復用不如決策東鄉爭權天下項羽出關使人徙義帝曰古之帝者地方千里必居

上游

正義音流

乃使使徙義帝長沙郴縣趣義帝行

正義音促趣

羣臣稍倍叛之乃陰令衡山王臨江王擊之殺義帝江

南項羽怨田榮立齊將田都為齊王田榮怒因自立為

齊王殺田都而反楚予彭越將軍印令反梁地楚令蕭

公角擊彭越彭越大破之陳餘怨項羽之弗王已也令

夏說說田榮

正義上音悅下音稅

請兵擊張耳齊子陳餘兵擊破

常山王張耳張耳亡歸漢迎趙王歇於代復立為趙王

趙王因立陳餘為代王項羽大怒北擊齊八月漢王用

韓信之計從故道索隱駟案地理志武都有故道縣還襲雍王章邯邯

迎擊漢陳倉正義今岐州縣也雍兵敗還走止戰好時集解孟康曰時

音止神靈之所在也縣名屬右扶風又復敗走廢丘漢王遂定雍地東至

咸陽引兵圍雍王廢丘索隱按荀悅漢紀令樊噲圍之而遣諸將略定

隴西北地上郡令將軍薛歐正義音惡后反王吸出武關索隱按表

歐以舍人從為將軍封廣平侯因王陵兵南陽集解如淳曰王



陵亦聚黨數千人居南陽正義括地志云王陵故城在商州上洛縣南三十一里荆州記云昔漢高祖入秦王陵起兵丹水以應之此城王陵所築因名也

以迎太公呂后於沛楚聞之發

兵距之陽夏

索隱韋昭云縣名屬淮陽後屬陳夏音更雅反

不得前令故吳令

鄭昌為韓王距漢兵

二年漢王東略地塞王欣翟王翳河南王申陽皆降韓王昌不聽使韓信擊破之於是置隴西北地上郡渭南

集解徐廣曰後曰京兆

河上

集解徐廣曰馮翊

中地郡

集解徐廣曰扶風

關外置

河南郡

集解徐廣曰十月漢王至陝

更立韓太尉信為韓王諸將以

萬人若以一郡降者封萬戶繕治河上塞

集解晉灼曰  
晁錯傳秦時

北攻胡築  
河上塞

諸故秦苑囿池皆令人得田之正月虜雍

王弟章平大赦罪人漢王之出關至陝撫關外父老還  
張耳來見漢王厚遇之二月令除秦社稷更立漢社稷  
三月漢王從臨晉渡魏王豹將兵從下河內虜殷王置

河內郡南渡平陰津至雒陽新城

正義括地志云洛州  
伊闕縣在州南七十

里本漢新城也隋文帝改新  
城為伊闕取伊闕山為名也

三老董公遮說漢王

正義  
百官

表云十里一亭亭有長十亭一鄉鄉有三老掌教化皆  
秦制也又樂彥云橫道自言曰遮楚漢春秋云董公八

十二遂封

為成侯 以義帝死故漢王聞之袒而大哭

集解如淳曰袒亦如

禮袒

踴 遂為義帝發喪臨三日發使者告諸侯曰天下共

立義帝北面事之今項羽放殺義帝於江南大逆無道

寡人親為發喪諸侯皆縞素悉發關內兵收三河士

集解

韋昭曰河南河東河內

南浮江漢以下

正義南收三河士發關內兵從雍州入子午道至漢

中歷漢水而下從是東行至徐州擊楚

願從諸侯王擊楚之殺義帝者是

時項王北擊齊田榮與戰城陽田榮敗走平原

正義德州平原

是平原民殺之齊皆降楚楚因焚燒其城郭係虜其子

女齊人叛之田榮弟橫立榮子廣為齊王齊王反楚城

陽項羽雖聞漢東既已連齊兵欲遂破之而擊漢漢王

以故得劫五諸侯兵遂入彭城項羽聞之乃引兵去齊

從魯

正義兗州曲阜也

出胡陵

正義地理志云胡陵在山陽郡

至蕭

正義徐州蕭縣

與

漢大戰彭城靈壁東

正義在徐州符離縣西北九十里

睢水上大破漢

軍多殺士卒睢水為之不流乃取漢王父母妻子於沛

置之軍中以為質當是時諸侯見楚彊漢敗還皆去漢

復為楚塞王欣亡入楚呂后兄周呂侯為漢將兵居下

邑

集解徐廣曰在梁

漢王從之稍收士卒軍碭漢王乃西過梁

地至虞

集解徐廣曰在梁

使謁者隨何之九江王布所曰公能

令布舉兵叛楚項羽必留擊之得留數月吾取天下必矣隨何往說九江王布布果背楚楚使龍且往擊之漢王之敗彭城而西行使人求家室家室亦亡不相得敗後乃獨得孝惠六月立為太子大赦罪人令太子守櫟陽諸侯子在關中者皆集櫟陽為衛引水灌廢丘廢丘降章邯自殺更名廢丘為槐里於是令祠官祀天地四

方上帝山川以時祀之興關內卒乘塞

集解李奇曰乘守也

是時

九江王布與龍且戰不勝與隨何間行歸漢漢王稍收士卒與諸將及關中卒益出是以兵大振滎陽破楚京

索間

三年魏王豹謁歸視親疾至即絕河津反為楚漢王使酈生說豹豹不聽漢王遣將軍韓信擊大破之虜豹遂

定魏地置三郡曰河東

正義今蒲州也

太原

正義今并州

上黨

正義今潞

州漢王乃令張耳與韓信遂東下井陘擊趙斬陳餘趙

王歇其明年立張耳為趙王漢王軍滎陽南築甬道

集解

甬音勇韋昭云起土築牆中間為道應劭云恐敵抄輜重故築垣牆如街巷

屬之河以取敖

倉

正義孟康云敖地名在滎陽西北山上臨河有大倉太康地理志云秦建敖倉於成臯

與項羽

相距歲餘項羽數侵奪漢甬道漢軍乏食遂圍漢王漢

王請和割滎陽以西者為漢項王不聽漢王患之乃用

陳平之計予陳平金四萬斤以間疏楚君臣於是項羽

乃疑亞父亞父是時勸項羽遂下滎陽及其見疑乃怒

辭老願賜骸骨歸卒伍未至彭城而死漢軍絕食乃夜

出女子東門二千餘人被甲楚因四面擊之將軍紀信  
乃乘王駕詐為漢王誑楚楚皆呼萬歲之城東觀以故  
漢王得與數十騎出西門遁令御史大夫周苛魏豹縱  
公守滎陽諸將卒不能從者盡在城中周苛縱公相謂

曰反國之王難與守城因殺魏豹

集解徐廣曰按月表  
三年七月王出滎陽

八月殺魏豹而又云四年三月周苛死四月魏豹  
死二者不同項羽殺紀信周苛縱公皆是三年中

漢王

之出滎陽入關收兵欲復東袁生說漢王曰漢與楚相  
距滎陽數歲漢常困願君王出武關項羽必引兵南走



王深壁令滎陽成臯間且得休使韓信等輯河北趙地  
連燕齊君王乃復走滎陽未晚也如此則楚所備者多  
力分漢得休復與之戰破楚必矣漢王從其計出軍宛

葉間

正義宛於元反葉式涉反宛鄧州縣也葉汝州縣水經注云本楚惠王封諸梁子兼號曰葉城即子

高之故邑也

與黥布行收兵項羽聞漢王在宛果引兵南漢

王堅壁不與戰是時彭越渡睢水與項聲薛公戰下邳  
彭越大破楚軍項羽乃引兵東擊彭越漢王亦引兵北  
軍成臯項羽已破走彭越聞漢王復軍成臯乃復引兵

西拔滎陽誅周苛縱公而虜韓王信遂圍成臯漢王跳

集解徐廣曰音逃索隱如淳云跳走也晉灼按劉澤傳跳驅至長安說文音徒調反通俗文云超通為跳獨

與滕公共車出成臯玉門

集解徐廣曰項羽紀云北門名玉門索隱夏侯嬰為滕令

故呼為滕公

北渡河馳宿修武自稱使者晨馳入張耳韓信

壁而奪之軍乃使張耳北益收兵趙地使韓信東擊齊

漢王得韓信軍則復振引兵臨河南饗軍小修武南

集解

晉灼曰在大修武城東

欲復戰郎中鄭忠乃說止漢王使高壘深

塹勿與戰漢王聽其計使盧綰

集解蘇林曰綰音以繩綰結物之綰

劉賈

將卒二萬人騎數百渡白馬津

索隱即黎陽津也南界東郡白馬縣

入楚

地與彭越復擊破楚軍燕郭西

索隱故南燕國也在東郡秦以為縣

遂復

下梁地十餘城淮陰已受命東未渡平原漢王使酈生

往說齊王田廣廣叛楚與漢和共擊項羽韓信用蒯通

計遂襲破齊齊王烹酈生東走高密項羽聞韓信已舉

河北兵破齊趙且欲擊楚則使龍且周蘭

集解徐廣曰一作簡

往

擊之韓信與戰騎將灌嬰擊大破楚軍殺龍且齊王廣

犇彭越當此時彭越將兵居梁地往來苦楚兵絕其糧

食

四年項羽乃謂海春侯大司馬曹咎曰謹守成臯若漢

挑戰

正義挑田  
弔反下同

慎勿與戰無令得東而已我十五日必

定梁地復從將軍乃行擊陳留外黃睢陽下之漢果數

挑楚軍楚軍不出使人辱之五六日大司馬怒渡兵汜

水

正義汜音祀在  
成臯故城東

士卒半渡漢擊之大破楚軍盡得楚

國金玉貨賂大司馬咎長史欣皆自剄汜水上項羽至

睢陽聞海春侯破乃引兵還漢軍方圍鐘離昧於滎陽

東項羽至盡走險阻韓信已破齊使人言曰齊邊楚

集解

文頴曰  
邊近也

權輕不為假王恐不能安齊漢王欲攻之留侯

曰不如因而立之使自為守乃遣張良操印綬立韓信

為齊王

集解徐廣曰三月

項羽聞龍且軍破則恐使盱台人武

涉往說韓信韓信不聽楚漢久相持未決丁壯苦軍旅

老弱罷轉饟漢王項羽相與臨廣武之間而語項羽欲

與漢王獨身挑戰漢王數項羽曰始與項羽俱受命懷

王曰先入定關中者王之項羽負約王我於蜀漢罪一

索隱負音佩也

項羽矯殺卿子冠軍而自尊罪二

集解徐廣曰卿一作慶索

隱韋昭云宋義之號如淳曰卿者卿大夫之尊者子男之爵冠者人之首也尊宋義故加此號

項羽

已救趙當還報而擅劫諸侯兵入關罪三懷王約入秦

無暴掠項羽燒秦宮室掘始皇帝冢私收其財物罪四

又彊殺秦降王子嬰罪五詐阮秦子弟新安二十萬王

其將罪六項羽皆王諸將善地

索隱謂章邯等

而徙逐故主

索隱

謂田氏趙歇韓廣之屬也

令臣下爭叛逆罪七項羽出逐義帝彭城

自都之奪韓王地并王梁楚多自予罪八項羽使人陰

弑義帝江南罪九夫為人臣而弑其主殺已降為政不平主約不信天下所不容大逆無道罪十也吾以義兵從諸侯誅殘賊使刑餘罪人擊殺項羽何苦乃與公挑戰項羽大怒伏弩射中漢王漢王傷胷乃捫足曰虜中

吾指

索隱捫摸也中胷而捫足者蓋以矢初中痛悶不知所在故爾或云胷而捫足權以安士卒之心也

漢王病創臥張良彊請漢王起行勞軍以安士卒毋命

楚乘勝於漢漢王出行軍

正義行寒孟反

病甚因馳入成臯

索隱

三輔故事曰楚漢相距於京索間六年身被大創十二矢石通中過者有四言漢王病創也

病愈西

入關至櫟陽存問父老置酒梟故塞王欣頭櫟陽市

索隱

梟縣首於木也欣自剄於汜水上今梟之於櫟陽者以舊都故梟以示之也

留四日復如軍

軍廣武關中兵益出當此時彭越將兵居梁地往來苦楚兵絕其糧食田橫往從之項羽數擊彭越等齊王信又進擊楚項羽恐乃與漢王約中分天下割鴻溝而西

者為漢鴻溝而東者為楚

索隱應劭云在滎陽東南二十里蓋引河東南入淮泗也

張華云一渠東流經浚儀是始皇所鑿引河灌大梁謂之鴻溝一渠東至陽武南為官渡水北征記云中年臺下臨汴水是項王歸漢王父母妻子軍中皆呼萬歲乃為官渡水也



歸而別去項羽解而東歸漢王欲引而西歸用留侯陳平計乃進兵追項羽至陽夏南止軍與齊王信建成侯彭越期會而擊楚軍至固陵不會楚擊漢軍大破之漢

王復入壁深塹而守之用張良計於是韓信彭越皆往

及劉賈入楚地圍壽春

正義今壽州

漢王敗固陵

集解晉灼曰即固始

乃使使者召大司馬周殷舉九江兵而迎之

集解徐廣曰周殷以

兵隨劉賈武王行屠城父

正義父音甫今亳州縣

隨何劉賈齊梁諸侯

皆大會垓下

集解徐廣曰七月

立武王布為淮南王

五年高祖與諸侯兵共擊楚軍與項羽決勝垓下淮陰侯將三十萬自當之孔將軍居左費將軍居右皇帝在後絳侯柴將軍在皇帝後項羽之卒可十萬淮陰先合

不利却孔將軍費將軍縱

正義二人韓信將也縱縱兵擊項羽也以縱字為絕句孔

將軍琴侯孔熙費將軍費侯陳賀也

楚兵不利淮陰侯復乘之

正義復侯富反乘猶

登也進也

大敗垓下項羽卒聞漢軍楚歌

索隱應劭云楚歌今鷄鳴歌也顏遊

秦云楚歌猶吳謳也按高祖令戚夫人楚舞自為楚歌是楚人之歌聲也

以為漢盡得楚地

項羽乃敗而走是以兵大敗使騎將灌嬰追殺項羽東

城

集解徐廣曰十二月

斬首八萬遂畧定楚地魯為楚堅守不下

漢王引諸侯兵北示魯父老項羽頭魯乃降遂以魯公  
號葬項羽穀城還至定陶馳入齊王壁奪其軍正月諸  
侯及將相相與共請尊漢王為皇帝漢王曰吾聞帝賢  
者有也空言虛語非所守也吾不敢當帝位羣臣皆曰  
大王起微細誅暴逆平定四海有功者輒裂地而封為  
王侯大王不尊號皆疑不信臣等以死守之漢王三讓  
不得已曰諸君必以為便便國家甲午

集解徐廣曰月甲午

乃即

皇帝位汜水之陽

集解蔡邕曰上古天子稱皇其次稱帝其次稱王秦承三王之末為漢驅

除自以德兼三皇五帝故并以為號漢高祖受命功德宜之因而不改正義汜音敷劔反括地志云高祖即位壇在曹州濟陰縣界張晏曰汜水在濟陰界取其汜愛弘大而潤下 皇帝曰義帝無後齊

王韓信習楚風俗徙為楚王都下邳

正義音被悲反泗州下邳縣是楚王

韓信之都

立建成侯彭越為梁王都定陶

正義曹州濟陰縣城是梁王彭越之

都故韓王信為韓王都陽翟

正義洛州陽翟縣是韓王信之都

徙衡山

王吳芮為長沙王都臨湘

正義括地志云潭州長沙縣本漢臨湘縣長沙王吳芮都

之芮墓在長沙縣北四里

番君之將梅鋗有功從入武關故德番君

淮南王布燕王臧荼趙王敖皆如故天下大定高祖都

雒陽諸侯皆臣屬故臨江王驩

集解徐廣曰一作尉

為項羽叛漢

令盧綰劉賈圍之不下數月而降殺之雒陽五月兵皆

罷歸家諸侯子在關中者復之十二歲其歸者復之六

歲食之

正義食音寺

一歲高祖置酒雒陽南宮

正義括地志云南宮在雒

州雒陽縣東北二十六里洛陽故城中輿地志云秦時已有南北宮

高祖曰列侯諸將無

敢隱朕皆言其情吾所以有天下者何項氏之所以失

天下者何高起王陵對曰

集解孟康曰姓高名起瓚曰漢帝年紀高帝時有信平侯

臣陵都武侯臣起魏相丙吉奏事  
高帝時奏事有將軍臣陵臣起

陛下慢而侮人項羽

仁而愛人然陛下使人攻城畧地所降下者因以予之  
與天下同利也項羽妬賢嫉能有功者害之賢者疑之  
戰勝而不予人功得地而不予人利此所以失天下也  
高祖曰公知其一未知其二夫運籌策帷帳之中決勝  
於千里之外吾不如子房鎮國家撫百姓給餽饗不絕  
糧道吾不如蕭何連百萬之軍戰必勝攻必取吾不如  
韓信此三人皆人傑也吾能用之此吾所以取天下也

項羽有一范增而不能用此其所以為我擒也高祖欲  
長都雒陽齊人劉敬說及留侯勸上入都關中高祖是  
日駕入都關中六月大赦天下十月燕王臧荼反攻下

代地高祖自將擊之得燕王臧荼即立太尉盧縮為燕

王使丞相噲將兵攻代其秋利幾反

正義幾音機姓名也項羽之將為陳

縣令降漢高帝徵諸侯利幾恐故反

高祖自將兵擊之利幾走利幾者項

氏之將項氏敗利幾為陳公不隨項羽亡降高祖高祖

侯之潁川高祖至雒陽舉通侯籍召之

集解如淳曰得在通侯之籍

而利幾恐故反

六年高祖五日一朝太公如家人父子禮太公家令說太公曰天無二日土無二王今高祖雖子人主也太公

雖父人臣也奈何令人主拜人臣如此則威重不行後

高祖朝太公擁篲

集解李奇曰為恭也  
如今卒持帚者也

迎門却行高祖

大驚下扶太公太公曰帝人主也奈何以我亂天下法

於是高祖乃尊太公為太上皇

集解蔡邕曰不言帝非天子也索隱按本紀秦

始皇追尊莊襄王為太上皇已有故事矣蓋太上皇也心善者無上也皇者德大於帝故尊其父號太上皇也



家令言賜金五百斤

索隱顧氏按荀悅云故雖天子必有尊也無父猶設三老况其存乎

家令之言過矣晉劉寶云善其發悟己心因得尊崇父號也

十二月人有上變事告

楚王信謀反上問左右左右爭欲擊之用陳平計乃偽

遊雲夢

集解韋昭曰在南郡華容縣

會諸侯於陳楚王信迎即因執

之是日大赦天下田肯賀

索隱漢紀及漢書作宵劉顯云相傳作肯也

因說

高祖曰甚善陛下得韓信又治秦中

集解如淳曰時山東人謂關中為秦

中秦形勝之國

集解張晏曰秦地帶山河得形勢之勝便者索隱韋昭云地形險固故能勝人

也帶河山之險縣隔千里持戟百萬秦得百二焉

集解應劭

曰河山之險與諸侯相懸隔地絕千里所以能禽諸侯者得天下之利百二也李斐曰河山之險由地勢高順流而下易故天下於秦懸隔千里持戟百萬秦得百二焉蘇林曰得百中之二焉秦地險固二萬人足當諸侯百萬人也索隱服虔云謂函谷關去長安千里為懸隔按文以河山險固形勝其勢如隔千里虞喜云百二者得百之二言諸侯持戟百萬秦地險固百倍於天下故云得百二焉言倍之也蓋言秦兵當二百萬也齊得十二亦如之故為東西秦言勢相敵但立文相避故云十二言餘諸侯十萬齊地形勝亦倍於他國當二十萬人

**地勢便利其以下兵於諸侯譬猶居高屋之上建瓴水**

也集解如淳曰瓴盛水瓶也居高屋之上而翻瓴水言其向下之勢易也建音蹇晉灼曰許慎曰瓴壘似瓶

者夫齊東有琅邪即墨之饒南有泰山之固西有濁河

之限

集解晉灼曰齊西有平原河水東北過高唐高唐即平原也孟津號黃河故曰濁河

北有勃

海之利

索隱崔浩云勃旁跌也旁跌出者橫在濟北故齊都賦云海旁出為勃名曰勃海郡

地方

二千里持戟百萬縣隔千里之外

索隱千里之外言齊境濶不啻千里故云

千里齊得十二焉

集解應劭曰齊得十之二故齊愍王稱東帝後復歸之卒為秦所滅者利

鈍之勢異也李斐曰齊有山河之限地方二千里是與天下懸隔也設有持戟百萬之衆齊得十中之二焉百

萬十分之二亦二十萬也但文相避爾故言東西秦其勢亦敵也蘇林曰十二得十中之二二十萬人當百萬

言齊雖固不如秦二萬乃當百萬

故此東西秦也非親子弟莫可使王

齊矣高祖曰善賜黃金五百斤後十餘日封韓信為淮

陰侯分其地為二國高祖曰將軍劉賈數有功以為荆

王

索隱乃王吳地在淮東也姚察按虞喜云總言吳別言荆者以山命國也今西南有荆山在陽羨界賈封

吳地而號荆王指取此義太康地理志陽羨縣本名荆溪

王淮東弟交為楚王王淮

西子肥為齊王王七十餘城民能齊言者皆屬齊

集解駟案

漢書音義曰此言時民流移故使齊言者還齊也正義按言齊之遠國次秦中故封子肥七十餘城近齊城邑能齊言者咸割屬齊親子故大其都也孟說恐非乃論功與諸列侯剖符行封

徙韓王信太原

索隱信初都陽翟也

七年匈奴攻韓王信馬邑

正義搜神記云昔秦人築城於武周塞以備胡城將成而

崩者數矣有馬馳走周旋反覆父老異之因依以築城乃不崩遂名馬邑括地志云朔州城漢鴈門即馬邑縣城也攻韓信於馬邑即此城信因與同謀反太原白土集解徐廣曰在上郡曼

丘臣王黃立故趙將趙利為王以反高祖自往擊之會

天寒士卒墮指者什二三遂至平城

正義括地志云朔州定襄縣本漢平

城縣縣東北三十里有白登山山上有臺名曰白登臺漢書匈奴傳云冒頓圍高帝於白登七日即此也服虔云白登臺名去平城七里李穆叔趙記云平城東七里有土山高百餘尺方十餘里亦謂此也匈奴圍

我平城七日而後罷去令樊噲止定代地立兄劉仲為

代王二月高祖自平城過趙雒陽至長安長樂宮成丞

相已下徙治長安

索隱漢儀注高祖六年更名咸陽曰長安三輔舊事渭城本咸陽地高帝

為新城七年屬長安也

八年高祖東擊韓王信餘反寇於東垣

集解駟案地理志曰東垣高帝

更名曰真定

蕭丞相營作未央宮

正義括地志云未央宮在雍州長安縣西北十里長

安故城中顏師古云未央殿雖南嚮而當上書奏事謁見之徒皆詣北闕公車司亦在北焉是則以北闕為正門而又有東門東闕至於西南兩面無門闕也蕭何初立未央宮以厭勝之術理宜然乎按北闕為正者蓋象秦作前殿渡渭水屬之咸陽以象天極閣道絕漢抵營室  
**立東闕北闕**集解駟案闕中記曰東有蒼龍闕北有玄武闕玄武所謂北闕索隱東闕名蒼龍北闕名玄武無西南二闕者蓋蕭何以厭勝之法故不

立說文云闕門觀也秦家舊宮皆在渭北而立東闕北闕蓋取其便前殿武庫太倉高祖

還見宮闕壯甚怒謂蕭何曰天下匈匈苦戰數歲成敗

未可知是何治宮室過度也蕭何曰天下方未定故可

因遂就宮室且夫天子以四海為家非壯麗無以重威

且無令後世有以加也高祖乃說高祖之東垣過栢人

正義括地志云栢人故城在邢州栢人縣西北十二里漢栢人屬趙國

趙相貫高等謀弑

高祖高祖心動因不留代王劉仲棄國亡自歸雒陽廢

以為合陽侯

正義括地志云郟陽故城在同州河西縣二里魏文侯十七年攻秦至鄭而還築在

郟水之陽也

九年趙相貫高等事發覺夷三族廢趙王敖為宣平侯

是歲徙貴族楚昭屈景懷齊田氏關中未央宮成高祖

大朝諸侯羣臣置酒未央前殿高祖奉玉卮

集解應劭曰鄉飲酒

禮器也受四升

起為太上皇壽曰始大人常以臣無賴

集解晉灼曰許

慎曰賴利也無利入於家也或曰江湖之間謂小兒多詐狡猾為無賴

不能治產業不如

仲力今某之業所就孰與仲多殿上羣臣皆呼萬歲大

笑為樂



十年十月淮南王黥布梁王彭越燕王盧綰荆王劉賈

楚王劉交齊王劉肥長沙王吳芮皆來朝長樂宮

正義括地

志秦櫟陽故宮在雍州櫟陽縣北三十五里秦獻公所造三輔黃圖云高祖都長安未有宮室居櫟陽宮也

春夏無事七月太上皇崩櫟陽宮楚王梁王皆來送葬

集解駟案漢書云葬萬年

赦櫟陽囚更命酈邑曰新豐

正義酈音力知反括地志

云新豐故城在雍州新豐縣西南四里漢新豐宮也太上皇時悽愴不樂高祖竊因左右問故答以平生所好皆屠販少年酤酒賣餅鬪雞蹴踘以此為歡今皆無此故不樂高祖乃作新豐徙諸故人實之太上皇乃悅按前于酈邑築城寺徙其民實之未改其名太上皇崩後命曰新豐

八月趙相國陳豨

集解

鄧展曰東海人名豬曰豨

反代地上曰豨嘗為吾使甚有信代地吾

所急也故封豨為列侯

集解徐廣曰豨攻定臧荼有功封陽夏侯

以相國守

代今乃與王黃等劫掠代地代地吏民非有罪也其赦

代吏民九月上自東往擊之至邯鄲上喜曰豨不南據

邯鄲而阻漳水吾知其無能為也聞豨將皆故賈人也

上曰吾知所以與之乃多以金啗豨將豨將多降者

十一年高祖在邯鄲誅豨等未畢豨將侯敞將萬餘人

游行王黃軍曲逆

集解文穎曰今中山蒲陰是

張春渡河

正義陳豨將也又劉

伯莊云彼時聊城在黃河之東王莽時乾今濁河西北也今在博州西北深丘道里記云王莽元城人居近河側祖父墳墓為水所衝引河入深川此王莽河因枯也

### 擊聊城

集解徐廣曰在平原正義括地志云

故聊城在博州聊城縣西二十里春秋時齊之西界漢聊攝也戰國時亦為齊地秦漢皆為東郡之聊城也

### 使將軍郭蒙與齊將擊大破之太尉周勃

集解駰案漢書百官表曰

太尉秦官應劭曰自上安下曰尉武官悉以為稱

### 道太原入定代地

集解韋昭曰道猶從

至馬邑馬邑不下即攻殘之豨將趙利守東垣高祖攻之不下月餘卒罵高祖高祖怒城降令出罵者斬之不罵者原之於是乃分趙山北立子恒以為代王都晉陽

集解如淳曰文紀言都中都又文帝過太原復晉陽中都二歲以遷都於中都也春淮陰侯韓

信謀反關中夷三族夏梁王彭越謀反廢遷蜀復欲反

遂夷三族立子恢為梁王子友為淮陽王秋七月淮南

王黥布反東并荆王劉賈地北渡淮楚王交走入薛高

祖自往擊之立子長為淮南王

十二年十月高祖已擊布軍會甄

集解徐廣曰在蘄縣西駟案漢書音義曰

會音儻保邑名甄音直偽反索隱漢書甄作缶音保非也

布走令別將追之高祖還

歸過沛留置酒沛宮

正義括地志云沛宮故地在徐州沛縣東南二十里一步悉召

故人父老子弟縱酒發沛中兒得百二十人教之歌酒

酣

集解應劭曰不醒不醉曰酣一曰酣洽也

高祖擊筑

集解韋昭曰筑古樂有弦擊之不鼓正義

音竹應劭云狀似瑟而大頭安弦以竹擊之故名曰筑顏師古云今筑形似瑟而小細項

自為歌詩

曰大風起兮雲飛揚威加海內兮歸故鄉安得猛士兮

守四方令兒皆和習之高祖乃起舞慷慨傷懷泣數行

下謂沛父兄曰游子悲故鄉吾雖都關中萬歲後吾魂

魄猶樂思沛且朕自沛公以誅暴逆遂有天下其以沛

為朕湯沐邑

集解駟案風俗通義曰漢書註沛人語初發聲皆言其其者楚言也高祖始登帝位

教令言其後  
以為常爾

復其民世世無有所與沛父兄諸母故人

日樂飲極驪道舊故為笑樂十餘日高祖欲去沛父兄

固請留高祖高祖曰吾人衆多父兄不能給乃去沛中

空縣皆之邑西獻

集解如淳曰獻牛酒

高祖復留止張

集解張晏曰張帷帳

正義音張亮反

飲三日沛父兄皆頓首曰沛幸得復豐未復唯

陛下哀憐之高祖曰豐吾所生長極不忘爾吾特為其

以雍齒故反我為魏沛父兄固請乃并復豐比沛於是

拜沛侯劉濞

集解服虔曰濞音帛

為吳王漢將別擊布軍洮水南

北集解徐廣曰洮音道在江淮間

皆大破之追得斬布鄱陽樊噲別將

兵定代斬陳豨當城

索隱代之縣名正義括地志云當城在朔州定襄縣界土地十三州

記云當城在高柳東八十里縣當常山故曰當城

十一月高祖自布軍至長安

十二月高祖曰秦始皇帝楚隱王

索隱世家作幽王名擇負芻之兄

陳

涉魏安釐王

索隱史闕名昭王之子王假之祖

齊湣王

索隱名地宣王子王建祖

趙

悼襄王

索隱名偃孝成王丹之子幽王遷之父

皆絕無後子守冢各十家

秦皇帝二十家魏公子無忌五家赦代地吏民為陳豨

趙利所劫掠者皆赦之陳豨降將言豨反時燕王盧綰

使人之稀所與陰謀上使辟陽侯迎綰

正義審食其也  
括地志云辟陽

故城在冀州信都縣  
西三十五里漢舊縣

綰稱病辟陽侯歸具言綰反有端

矣二月使樊噲周勃將兵擊燕王綰赦燕吏民與反者  
立皇子建為燕王高祖擊布時為流矢所中行道病病  
甚呂后迎良醫醫入見高祖問醫醫曰病可治於是高  
祖嫚罵之曰吾以布衣提三尺劍取天下此非天命乎  
命乃在天雖扁鵲何益遂不使治病賜金五十斤罷之  
已而呂后問曰陛下百歲後蕭相國即死令誰代之上



曰曹參可問其次上曰王陵可然陵少戇陳平可以助之陳平智有餘然難以獨任周勃重厚少文然安劉氏者必勃也可令為太尉呂后復問其次上曰此後亦非

而所知也盧綰與數千騎居塞下候伺幸上病愈自入

謝四月甲辰高祖崩長樂宮

集解皇甫謐曰高祖以秦昭王五十一年生至漢十

二年年六十三

四日不發喪呂后與審食其謀曰諸將與帝為

編戶民今北面為臣此常怏怏今乃事少主非盡族是

天下不安人或聞之語酈將軍

集解駸案漢書曰酈商

酈將軍往

見審食其曰吾聞帝已崩四日不發喪欲誅諸將誠如此天下危矣陳平灌嬰將十萬守滎陽樊噲周勃將二十萬定燕代此聞帝崩諸將皆誅必連兵還鄉以攻關中大臣內叛諸侯外反亡可翹足而待也審食其入言之乃以丁未發喪大赦天下盧綰聞高祖崩遂亡入匈

奴丙寅葬

集解徐廣曰五月

己巳立太子

正義丙寅葬後四日至己巳即立太子為

帝有本脫已字者妄引漢書云已下者非

至太上皇廟

正義三輔黃圖云太上皇廟在長安城香

室南馮翊府北括地志云漢太上皇廟在雍州長安縣西北長安故城中酒池之北高祖廟北高帝廟亦在故

也城中羣臣皆曰高祖起微細撥亂世反之正平定天下

為漢太祖功最高上尊號為高皇帝太子襲號為皇帝

孝惠帝也令郡國諸侯各立高祖廟以歲時祠及孝惠

五年思高祖之悲樂沛以沛宮為高祖原廟

集解徐廣曰光武紀

曰上幸豐祠高祖於原廟駟按謂原者再也先既已立廟今又再立故謂之原廟

高祖所教歌

兒百二十人皆令為吹樂後有缺輒補之高祖八男長

庶齊悼惠王肥次孝惠呂后子次戚夫人子趙隱王如

意次代王恒已立為孝文帝薄太后子次梁王恢呂太

后時徙為趙共王次淮陽王友呂太后時徙為趙幽王

次淮南厲王長次燕王建

太史公曰夏之政忠忠之敝小人以野

集解鄭玄曰忠質厚也野少禮

節故殷人承之以敬敬之敝小人以鬼

集解鄭玄曰多威儀如事鬼神

故周人承之以文文之敝小人以僂

集解徐廣曰一作薄駟按史記音隱

曰僂音西志反鄭玄曰文尊卑之差也薄苟習文法無悃誠也索隱鄭音先代反鄙本作薄音扶各反本一作

僂而徐廣云一作薄是本互不同也然此語本出禮表記作其民之敝利而巧文而不慙賊而蔽也裴又引音

隱云僂音西志者蔽僂聲相近故以蔽為僂爾

故救僂莫若以忠

集解鄭玄曰復反始三

王之道若循環終而復始周秦之間可謂文敝矣秦政

不改反酷刑法豈不繆乎故漢興承敝易變使人不倦

得天統矣朝以十月車服黃屋左纛葬長陵

集解皇甫謐曰長陵

山東西廣百二十丈高三丈在渭水北去長安城三十

里五里正義括地志云長陵在雍州咸陽縣東三十里

公肅命豪傑奮發材雄彤雲鬱碣素靈告豐龍變星

聚蛇分徑空項氏主命負約棄功王我巴蜀實憤于

衷三秦既北五兵遂東汜水即位咸陽築宮威加四

海還歌

大風

# 史記卷八

史記卷八考證

高祖本紀姓劉氏索隱因生賜姓若舜生姚墟以為姚  
姓封之於虞號有虞氏其後子孫即遂以虞為姓云  
姓虞氏今此云姓劉氏亦其義也○吳仁傑兩漢刊  
誤補遺曰索隱之說非也姓與氏相近而不同古者  
賜姓命氏如賜姓曰董氏曰豢龍析姓氏而二之則  
固有別矣劉氏本陶唐氏之後則劉者氏也非姓也  
於此當云高祖劉氏出自祁姓可也此誤自太史公

啟之

常從王媪武負貫酒索隱鄒誕生貫音世與字林聲韻  
並同又音時夜反廣雅云貫賒也說文云貫貸也臨  
淮有貫陽絲漢書功臣表貫陽侯劉纏而此記射陽  
則貫亦射也○顏師古曰貫賒也李登呂忱並音式  
制反而今之讀者謂與射同乃引地名射陽其字作  
貫以為證驗此說非也假令地名為射自是假借當  
時所呼別有意義豈得即定其字以為正音乎

此兩家常折券棄責索隱周禮小司冠聽稱責以傅別  
○周禮小司冠但有正之以傅別約劑之文聽稱責  
以傅別本小宰職中語

生孝惠魯元公主正義漢帝制句女曰公主句儀比諸

侯句○推尋文義宜云漢制句帝女曰公主句

乃以竹皮為冠索隱應劭曰一名長冠側竹皮裏以縱  
前高七寸廣三寸如板○後漢書輿服志云高七寸  
廣三寸促漆纚為之制如板然則側竹皮裏以縱前



七字應是竹皮裹以纒之訛

吾子白帝子也化為蛇當道今為赤帝子斬之集解應  
劭曰秦襄公自以居西戎主少昊之神作西時祠白  
帝至獻公時櫟陽雨金以為瑞又作畦時祠白帝少  
昊金德也赤帝堯後謂漢也殺之者明當漢滅秦也  
秦自謂水漢初自謂土皆失之至光武乃改定○黃  
氏日抄曰白帝子注謂指秦葉碧菴先生以為西楚  
徐孚遠曰沈休文以為白帝金也金生水白帝之子

水赤帝火也火生土赤帝之子土也然則秦自謂水漢自謂土不為失也失在誤以赤帝子為赤帝也

高祖覺索隱包愷伯莊音古孝反○伯莊上宜有劉字隱於芒碭山澤巖石之間正義括地志云宋州碭山縣在州東一百五十里本漢碭陽縣也○陽字疑衍

季所居上常有雲氣正義顏師古曰京房易兆候云○隋書經籍志作易飛候

還攻外黃索隱韋昭云上陳留縣○上字衍外黃縣屬

陳留郡蓋云陳留之縣耳或上字係在字之訛下縣  
字衍

因襲攻武關破之索隱左傳云楚司馬起營所以臨上  
雒○哀四年左傳云司馬起豐析與狄戎以臨上雒  
封皇帝璽符節正義天子信璽以遷拜封王侯之璽以  
發兵○據唐書禮志之璽上有天子二字

漢王堅壁不與戰○一本無王字

十月燕王臧荼反○凌稚隆曰十月字疑誤高祖用秦

正十月後事當屬次年

高祖雖子人主也○王若虛辨惑曰是時未有高祖號  
劉子元辨之誠中其病漢書改為皇帝是矣

其以沛為朕湯沐邑集解駟案風俗通義曰漢書注沛  
人語初發聲皆言其其者楚言也高祖始登帝位教  
令言其後以為常爾○王若虛辨惑曰予謂不然戒  
辭用其字自是本法古文如是者何可勝舉而云楚  
語獨爾不亦妄乎

楚隱王陳涉索隱世家作幽王名擇負芻之兄○

臣世

駿

按此五字相連始皇本紀云陳勝自立為楚王月表云二世元年七月楚隱王陳涉起兵入秦陳涉世家云陳勝葬碣諡曰隱王高祖時為陳涉置守冢三十家碣至今血食索隱乃截楚隱王三字另作一人而楚無此王則以幽王當之殊屬牽強且幽王亦名悼不名擇也或以六國為疑則燕韓業已不與安見楚之必不可遺哉

高祖崩長樂宮集解皇甫謐曰高祖以秦昭王五十一年生至漢十二年年六十三○

臣世駿

按高祖生年

乙巳至是年丙午當是六十二

朝以十月車服黃屋左纛○左監本訛作志今改正

史記卷八考證